

水
南
集

三



水南集卷九

明德清陳 霆聲伯著

歌行

二仙傳道圖

名山靈境多仙草藥斧花籃挈輕小坐談夕日契參同
交養元神驗梨棗青山不覺紅塵擾紅顏不信青春老
市中懸壺偶然出洞裏圍碁未曾了未曾了世幾何吟
飛雙鶴渺無迹空山落葉秋風多

麥舟

吳江岸上麥正秋吳江橋下停行舟故人三喪尙淺坵
容顏慘淡懷窮愁舟中百斛我所收挈贈未論瓊與玖

空然歸去不少留滿倉月色浮中流浮中流棹歌起丈
夫例落魄意氣古相許世閒元振安得逢客路空亭幾
秋雨

嚴陵圖

山青青江泠泠片石高出秋雲崩山風江月伴醉醒直
鈎寄我無何情羊裘有跡尋先生帝腹有象勞客星歸
來山水不改清一絲實重九鼎輕世間榮利真鈎餌往
往持竿妄相擬意不在山志不在水徵書物色來千里
喜動苔磯拂衣起濠梁魚樂且莫言我自惟知鈎名耳

梅竹石圖

怪石山人厭塵俗居傍梅花間修竹空堂影沁碧雲寒

淡月香浮絳紗簇壽陽睡起春未消珊瑚薄膩胭脂嬌
背立東風悄無語環珮微動聲飄搖淒涼莫聽桓伊笛
愁入瀟湘重相憶九疑鳳去幾何年淚灑琅玕血猶濕
元獻西岡萬樹春蜀州一笑欲銷魂篋管誰寫東牆句
疑是羅浮夢裏人蔣家三徑今何處留取龍孫未飛去
隔窗煙霧掃不開鱗甲紛紛落紅雨孤山標格天下奇
渭川原是封侯姿千花萬蕊奚足數惟有丹心勁節可
與徂徠知

竹溪六逸圖

清溪洄流深且長老竹蔽日森而蒼人間炎氣如鑊湯
枕簟有此冰雪鄉碧甌盛醴盆渴漿夏果新脆旗芽香

笑談從事筆墨場琴阮在御書盈箱一人袒褐居中央
烏紗半幅瑤簪光一人挾冊窺虞唐思窮萬象搜毫芒
整襟一人貌若揚塵頭洒洒霏雪霽坦懷一人手舉觴
目送孤鳥雲中翔一人拄頰推敲忙一人旁睨首獨昂
山林可樂世可忘脫遺勢利辭軒裳翰林風神疇比方
皎如明月來空堂孔君入海觀扶桑東隋煙霧迷蒼茫
座間韓裴陶與張各秉冲素能文章鴻冥千載不可望
豈知展卷來吾傍吁嗟魏季崇老莊戎濤籍秀伶咸康
竹林糟蘖慚流芳詎若茲會超尋常蹇予何幸歸林塘
手開篁徑營梧崗平生冰炭不入腸俯眎一世眞糝糠
輕絺無汗石屋涼穎兔掃盡毫端霜解衣偃卧斑竹床

四窗飛溜聲琅琅

百鳥朝王圖

陽烏騰翅扶桑東炎輪湧出如血紅乾坤上下普一照
萬國俱在文明中高崗灑露滴成水翠光洗淨梧桐子
九苞靈鷲何處來五色鮮明炫金紫紛紛百鳥意盡降
異哉羽族知朝王氣機感召類相聚各効音弄成文章
畫眉蚤赴鴛鴦會鸚鵡能言鴈鴒慧黃鸝却美練鵲閑
白鷺還嫌鴻鵠睡山鷄照水錦紋裊竟日無魚憐翠鳥
螳螂在念黃雀貪花柳關情白頭老竊脂沙燕競相逐
幽野無如白鷗獨喧啾翁雜水陸旁只有鴉鷲向林宿
春朝小雨融芳泥細桃溼透紅臙脂分明一片錦色界

太平瑞物時來儀君家有鳳方雛小丹穴生成羽毛好
他年霄漢領鵷鸞未詫孤鶩壓凡鳥

雪梅圖

幽人歲晚卧空谷布衾紙帳吟魂清床頭茶鼎工作祟
夜半忽作蒼蠅聲開門堦下三尺雪誰掃冰壑鋪瑤瓊
牆東老樹凍欲死頭角半露槎牙形孤山山下老逋魄
分與水月同平生何人移爾嚴冷地橫披重壓得我驚
逡巡皓鶴立不動辛苦翠羽噤不鳴風梳雨沐更何忍
參橫月落無緣憑憶昔西湖着詩屐暗香十里前來迎
先生洗眼認寒萼但有玉點侵雙睛踈踈密密巧妝綴
隱隱約約難分明歸來呼酒敵寒氣欲寫詩句竟未成

邇來放逐觸風雪破帽羸馬空山行昏鴉古木亦何限
但有窮苦縈心情山城荒落何所有伶仃野菊稀秋英
灞橋驢背不怕冷所少此物締詩盟君從何處得此幅
若有香味開狂醒令人覩此三嘆喟漫山桃李皆虛名
羅浮怪夢久不作藍關幻句誰能賡眼前苦境飽經歷
歲寒心事歸和羹

春雲欲雨圖

春雲欲雨春山黑百丈潛蛟起幽窟風雷爲作鼓舞態
松檜先呈欣喜色山中一雨未足多爲問欣喜將如何
田間焦壤苦龜兆車內渴鮒求餘波春雲好借爲霖手
天下蒼生正張口我聞沛澤貴博施抱甕無煩學窮叟

野人矮屋三重茅夜簷不厭聽嘈嘈已看生意足禾稼
更仰餘潤蘇蓬蒿穰穰樂歲歌君德不用東山起安石
春雲收斂寂若無龍氣還蒸萬山濕

邊鸞翎毛圖

蘋風獵獵蘋花冷淺碧回塘動秋影柳梢斜日作微晴
一片江鄉晚來景山禽照影特飛集三尺修翎雪光白
雄雌追逐臨水涯飲啄從知暫相得春鋤驚起飛且鳴
小鳥亦復啁啾聲青霄振羽向來志願此池沼安留情
栖遲更有兩蒼鳥蒲葦中間欲終老淺灘竟日不逢魚
那得爲生羽毛好生來嚼字不療飢采薇長向西山西
一如禽鳥畫中格江湖安得成高棲還君此圖休嘆息

憂道從來鄙謀食持家尙有筆似椽醉裏書空對晴碧

異獸障

張揮使
家物

曾聞西旅來神爨又聞角端能人嗥柱頭金鎖是何獸
毛衣猗惡風飄搔將軍拓矢夸猿臂胡馬埋藏虎深避
陰山有石誰不知沒羽銷金偶兒戲歸來天馬汗血紅
邊陲不動腥膻風龍韜豹畧壓蛇豕亦如此物居山中
太平有象兵戈廢赤鳳蒼麟迭稱瑞已聞西域請都護
又報龍川伏秦尉收藏猛類不復驅寶縑繫頸纓珠垂
夜寒仰首看山月小吼時復驚狐狸

題畫障

松頂瀉風竽瑟聲石澗溜泉蒼玉鳴不知何處有此境

遣我心地居然清平生雅有東山志正壑時時經夢寐
五更塵土上朝衣回首雲林渺空翠草堂三間青嶂隈
尋詩兩屐荒煙堆寄聲問訊讀書處惟有老鶴行蒼苔
畫圖對我應招隱却怪白雲棲不穩散襟晞髮坐者誰
背地無言似相哂老年終欲營菟裘歸我杖屨林泉游
殘書留取倚風讀破琴還合褰囊修塗雅膩墨潑詩句
坐借青山醒殘醉十年夢斷古槐根別有仙源外天地

蘆鴈行

銀塘八月秋雲冷一片澄光瀉天影枯蒲敗柳工作愁
相約斜陽狀煙景鶴鴿老去不復悲棹歌響處蓮舟歸
露荷冷落弭青蓋萬點清怨飄紅衣澎波盪石西風急

老鷺聯拳足難立滿天香雪撲釣篷只有蘆花弄江色
塞門紫映萬里秋草書一帶橫西樓寒聲共墮暮濠雨
孤影獨寄涼蟾洲江湖野意何人識夢裡瀟湘水苔碧
江楓漁火憶詩句風艇煙蓑滯羈客丈夫有志射四方
迴峯未用愁衡陽翩翩春燕亦何者老守門戶誇雕梁

瑞芝行

新安隱居有三芝之瑞寔爲前京兆汪君進之家世之祥西涯方石二先生皆

有詩勉
踵于後

黃山先生古道者晚坐詩窮類東野世鍾和氣表家瑞
墓產靈芝乃天假高堂方揭濃墨書奇事已達青雲衢
玉堂視草晝初永驪珠雨落宮壺餘先生志節夙高壯
歲晏秋崖凜相向論心每出俗士表持議嘗居古人上

茫茫天道知有無療飢豈必商巖徒坐令麟鳳不世見
三秀空附青山圖年來子姓庭堦秀古錦斑斕繞春晝
瑞芝不老罇不空更挿山花上翁壽

畫梅行

三年不作西湖遊夜景一段梅花愁橋邊詩屐阻東郭
蓬底鶴夢閒浮上山城見梅驚且喜逋老風神壓凡卉
暗香爲返水月魂萬點冰葩照清泚村籬斜月無吠豕
時有翠羽飛來雙酒消風冷不成夢戍樓長笛傳新腔
宮簾樺燭開粧匣一片瓊英額前落東風吹散外舍寒
裁得春旛滿城郭書生擁鼻哦梅詩湯瓶助作秋蟲悲
坐看香影落屏障卧想曳杖孤山時窗明瓦漏聞飄屑

古漆琴絲凍將折玉龍骨顛皓鶴醒童子開門滿堦雪

御溝行 都門餞別

御溝水含風細鱗起流脂漲膩香十里中有恩波浩無
涘春風送別溝上橋曉日杲杲波搖搖行人就水照衣
袂駐馬河邊攀柳條柳花日暮飛如雪溝水春深綠如
潑花沾離袖怨飄墮水出宮牆定嗚咽東流日夜無迴
期年光暗老人不知不如柳花飛舞落城裏明年依舊
河邊枝君不見濤江東望連滄渤仙派遙遙與溝接靈
槎付子期漫遊八月涼風浪花白

畫山水歌

遠山蒼芒疑有無近山重疊張畫圖山腰雲氣截欲斷

曉色映帶林煙孤須臾紅日曛曛出一道霞光迸天赤
煙消雲斂林影開但見青松露珠滴松頭老鶴戛戛鳴
松下華屋開雙扃幽人睡起未梳洗碧窗研露披殘經
山空谷暗羣籟寂坐聽飛泉響蒼壁奔流赴壑成鉅磨
上有方橋渡行客木欄石岸橋之東粉牆桃柳羅青紅
深深院落隔人語黃鸝上樹呼春風門前有客來何早
白馬金鞍踏芳草野夫迎候禮節疏橫撚枯藜躡芒屨
山中習靜日月長琴樽與客時徜徉雨餘觀鷺下白水
飯後牽犢犁青岡開門坐閱行人過去馬來牛逐塵霧
誰道生平雙脚跟不識長安九門路君不見淮西山水
天下奇水南居士來尋詩每乘欸段代雙足更借手版

支雙頤迂踈不了公家事退食潛來竹深處焚香瀹茗
聊自哦深下門關謝胥吏五更且免馳東華黃紬被裏
常放衙夢中猿鶴記舊隱覺來身世驚長沙還君此畫
休歎息一口天涯混南北醉眼元龍百尺樓卧對江南
數峰雪

石泉茅屋歌

汴人趙尙
書故隱

九衢黃霧撲馬鞍五更待漏朝靴寒□□金□萬人看
等是春夢迷邯鄲宴堂退食□□□老乞青山上應許
石泉一竇試春茗茅屋三間障秋雨水聲瀼瀼六月涼
亦有蘿月穿山房生憎尸祝擾畏壘自喜門徑符柴桑
功名回首事豈易剛道神仙在人世公行已久我晚歸

布襪青鞋獨來去

培心軒歌

丹田之上靈臺內有物方方曰心地乾坤生意藉爲主
天地精靈此維最小盈一掬大須彌歛藏充拓能神奇
自從堯舜到周孔往往培此爲根基陰私在內作茅塞
利害於人植荆棘理荒要使坦道通去蠹先須靖蝨賊
宋人掘苗良足嗤牛山有斧不可持孟軻寡欲乃要訣
顏氏復禮真吾師源頭活水潤枯槁穀種陽春發生好
青山綠樹開道境朱子喻道詩意霽月光風鼓庭草培心功力
君勿辭潤身效驗行自知清和着面德之發豐厚在背
非人爲吁嗟小夫錯用計天理削來無長處肺肝病痛

渾不知却仰君軒誦雙字

題朱大叅應周南崗卷用遂翁韻

東南半壁有此山懸崖千仞不可攀清香流泉發瑤草
疑有靈府非人間蟠空拗曲作虛洞明月來賓白雲送
山陽草木四時暖地底風雷五更動山人舊在山中住
猿鶴頻年守門戶朝陽催入浴鳳池白雲元是紅雲路
一言上徹聖心悟四海浸淫化甘露致君有說非渺茫
上追羲昊中虞唐忠肝素許一寸赤諫草動輒千言長
踈星淡月出建章乘風暫且辭帝旁德輝下覽止薇閣
化行還是文明祥山頭老楚餘餽糧新詩頌德敲清商
功成他日會返顧平地神仙計非誤百年勳業亦何遠

再世昇平豈常遇君不見白雲一榻碧梧秋仍是山人
舊巢處

西林勝境歌

太守張公舊隱山有鳳凰鸞阜霍岳佛耳之勝

天風吹客登恒峯掀髯一笑長天空山靈知我有豪興
示我千朶青芙蓉回頭恰與岫雲觸空翠濕衣渾似沐
天公容我縱大觀特瀉銀河洗雙目太行峻絕不可躋
羣峰遠接南來支龍翔虎躍迄不斷蔚然聚作西林奇
一山凝然直暘谷勢比高梧鳳凰宿朝陽炫采上扶桑
倒影天池似飛浴一山青削雲與齊天丁特遣支乾維
乘鸞不復見簫史空聞月下笙簫歸南瞻一山古名霍
衝斗排霄抵衡嶽回思漢帝錯遠巡空向瀟峰拜山脚

西南一山去天咫遠矚洪濛極千里靈光想見接五臺
時有流鈴清佛耳就中佳勝憑躋攀梵宮隱約蒼雲閒
天花長日作雨墜松濤六月驚人寒鸞山之祠紫垣帝
殿閣峩峩聳晴翠蒼松老檜三千株一山龍鱗出雲氣
誰其手植當金元閱人歷世五百年山川毓秀會有待
西林今屬瀛洲仙瀛仙早爲鶴書起挾策明廷獻天子
當時右省上星辰今日西吳作霖雨猿休驚鶴住怨薛
蘿且護衡門鍵清時未許袖雙手勝境空煩繫初念乾
坤整頓良不難紫樞黃閣看登遷直須措辦太平後海
舟却望東山旋君不聞神仙自昔在平地熟了黃梁別
無事歸來山水仍有緣曳杖西林白雲處

涵區歌

里士吳君外號

蒼寒影裏鷗鳧國一片澄光湛空碧纖雲不動萬景沉
獨放蘆花點江色方洲突起類孤嶼遙望青螺鏡心裏
蘋風歇定波面平老鴈叫空天接水落霞斂盡殘照低
漁梁倒入青玻璃君山境界洞庭晚寒潭皎月秋相宜
幽人中歲習寧靜結屋臨流日涵泳已看天地落硯池
更覺風煙入談柄平生兩眼事大觀蒐羅萬象加窮研
九州等是一撮土下視四海銀河連回思未盡涵區義
萬里淵淵聚心地神明之舍大道源止水靈臺無乃是
酒酣爲作涵區篇墨花滿紙飛雲煙興來絕叫拍闌檻
水禽衝起當窗前

東翠歌

江大尹別號
江南海人

天鷄唱罷東方曉
林影開張放棲鳥
須臾海日射松扉
瘴霧消來恰如掃
翠光似水凝不流
前山正矗湘屏秋
煙雲吞吐幾能久
海風吹作空青浮
長鯨噴到厓門雨
憑仗層峰夜來洗
起看且境漾修螺
較勝斜陽眩晴紫
幽人習懶卻巾幘
晨起疎櫺對遙碧
坐閒濃潤集琴床
不道荷衣被沾濕
年來兩脚黃埃地
清夢常關翠微處
叅軍手版未得抽
却背西風相嵐氣

號棲清詞

故人來自茗溪東
拄杖綠玉冠芙蓉
自言棲止最清處
情如野鶴巢雲松
九衢車馬漲黃霧
退食尋常日西暮

開圖陡覺心目醒指點林霏認歸路解衣謝客登竹床
夢中鳴櫓遊滄浪黃綠水石轉村澗步履忽到棲清堂
屋前老竹暗天日屋後飛泉落蒼壁綠堆桐子放鶴坡
口撲蘆花釣魚石茶煙一縷古樾間夕寒紅葉漫江山
溪光靜處水禽下巖影倒後晴雲還雙裾坐染莓苔色
空翠霏微向人滴石床淨掃碁局閒身在壺天九華窟
樾駒齧草韉鞞聲似驚風浪翻幃屏起來勝景悵然失
手版依舊塵中形故人故人絕高致正壑當知在胸次
不然占據世外清造化何能不深忌歸閒亦欲清境邊
石田茆屋終餘年青鞵不拒逕來路子固道者子其仙

號九山歌

一山赴水若渴驥前據洪崖後無地一山浮湖類巨鰲
煙雲出沒隨秋濤東南一山擁蒼翠良上還看一山對
一山界在河湖閒渡河南去口一山兩山迤邐江之滸
小樣龍鳳學掀舞湖西一山當案青牖閒朝暮瞻雲屏
山人住在九山內手斲黃精度飢歲頻年學道不出門
九仞爲山善稽顙夜深燈火聞咿唔山鬼暗笑窺簷蘿
棲棲猿鶴愁吟吟林臯落葉秋風多若耶溪上雲門寺
布襪青鞋任來去他年曳杖訪山人記取青山白雲處

送令尹

南風吹柳江亭涼荷花半開雲錦香朱輪畫舫口川湧
爭看父母趨明光城頭老倪手加額却嗟侯去誰來雙

我謫未竟君欲行解纜回頭月東出

奉李二守

用東坡遊
孤山韵

三山閩兩浙湖神交夙夢曾記無相看有酒便成醉豈
必折簡煩招呼通家契誼歡僮孥霜天菊月時相娛當
筵醉帽笑敲側擅場舞袖誇迂紆官閒齋舍類僧廬茶
煙繞榻鶴夢孤宦情付與老境蔗病姿分作先秋蒲談
空說有驚嗇夫坐揮犀塵終申晡城南衝雨幾回曉與
君合入龍眠圖年來庠裏寧復餘君詩餅餌富口籩何
時南歸酌老漣月香水影句同摹

寄題休寧縣秋水園亭歌

風流秋水亭中客走馬長安踏坊陌五更有夢不得閒

還到江南返江北江南手闢數畝園水邊篁竹淳三間
綠雲窗几蔽清晝篆煙一縷浮屏山得閒堂外羅花草
面翠闌前落鷗鳥小堤柳密飛絮多古洞苔深落紅少
吁嗟世事不可常似聞幽絕成荒涼池魚何用待失火
野鹿亦復充湯羊甘棠遺愛慚無德山水有靈當護惜
作詩寄語庸何傷一笑東風漾晴碧

明妃曲

黃雲萬里沙場暮回望邊關暗塵霧漢音絕少胡語多
此是死生離別路死生離別難願家含情寫怨憑琵琶
十年學就未出戶豈知馬上成咨嗟羶裘暗笑花枝泣
悲喜不同空脉脉不及西施入館娃羅襪香移屨廊跡

顧影忽自語身後累亦輕古來絕色解傾國蒙面曾污
朝歌兵戎王夜擁羶城冥從此天山罷飛箭但教精壯
萬骨全何惜飄零一身賤丹青貌妾貌那復知妾心惟
餘孤塚代汗簡春風草色青于今

枳軒

一軒深落蒼雲層問君何者爲軒名君言四外盡栽枳
枳以療世人因稱有如林井在當世配以杏橘延芳聲
吾軒聊爾措床竈此枳亦藉和參苓渾淪誰敢擬元氣
服餌豈便能長生奈何推譽太高美亦有詆薄中難平
或言內蘊太極心或言外破邕州城或言鸞鳳豈棲迹
或言水土能變形紛紛正欲富詩料落落未可名真情

含鹽時或亂青欖噴霧那許侔黃橙霜前雨後勤收摘
雲奩露筥時携擎人生百病有生死藥裏一味能重輕
中黃藉此得温健百爾邪惡烏能憑譬如大陣禦外侮
坐收偉績須奇兵幽人製劑不出戶小窗刀杵相雜鳴
扶衰久欲扣歧扁卻老妄意希眇彭作詩一笑問吾枳
但有鷄犬雲閒磨

放歌二篇

書于太原官舍

紺髮三十丈晞向朝霞中天公嗔我太狂躁一斥置我
兜羅峰白眼仰看人浩氣走赤虹寄聲向東海洒掃龍
王宮我欲放酒船鐵笛橫長風珊瑚備下二千尺蛟綃
速卷三百筒醉酣我欲試如意汗珠拭拂流酥紅聲華

北斗南名籍金門東一朝身世比仗馬終古禍福由尸
蟲看他蠅蚋逐驥尾耐他鷄雀棲蒿蓬五行交錯有定
數四時代謝推成功君看處士酒漉頭上葛豈換司徒
臭博腰閒銅世間污濁細故耳含飲正欲胸腹洪閒來
一事無夢覺諸緣空眼前有酒且須飲回看世態一笑
直與浮雲同

野鶴志萬里昂然鷄羣中南游廬岳揖五老大醉趯倒
香爐峰是時喉吻乾飲澗如長虹手持青琅玕三叫明
光宮天門端肅踞九虎步履叱落隨罡風歸來咤謫仙
驚世餘詩筒劍光上射斗牛紫文錦挽出天機紅越鳥
志在南馬首屢欲東糝糠滿世笑回首慚媿腐草明飛

蟲何人憐我成拙鳩何人嘆我類轉蓬南柯羣集未成
戰收歛墜翼爭餘功請君袖手且讓延廣劍古來鑄鼎
未要軒轅銅出門試作長袖舞歸鳥落日青天洪掉頭
煙霧深指眼風花空大鵬南去九萬里飄飄意氣超脫
象外直與蒙莊同

寫懷二首

亦用前東坡孤山韻

氣九秋量五湖天公生我有意無世間人事苦修飾夜
窗有客來相呼淒其四壁愁妻孥書空弄筆元非娛終
南捷徑彼自爾坦途安步從迂紆南山尙有先人廬茆
茨剝落秋風孤終須歸去事高遯陂塘釣石依菰蒲首
陽終古廉頑夫紫芝自昔供朝晡二蟲已墮江上笑二

牛合入山中圖蛇固不足夔有餘中年家過樟備遽掃
除世味蠲宿逋維摩病像時臨摹

居廟廊居江湖浮雲變態有若無當時我自坐輕出雲
林散髮誰能呼太倉日食不飽孥愁悰不柰驅歡娛青
衫易向馬首破紫袋豈便腰閒紆江南秋老諸葛廬白
雲紅葉歸思孤簿書期會得我厭况復狡獪勞鞭蒲少
年回首成壯夫日輪東起西忽晡霜髯皓鬢畫麟閣何
如點漆香山圖頑軀七尺晝睡餘茗甌罷啜猶遽遽晴
窗泚筆償詩逋硬黃落紙誰消摹

和王元章畫梅三首

君不見玉龍夜蛻十丈雪雪壓寒梅更清絕口前獨鶴

病且瘦三尺長脰凍幾折綠衣忽遣口夢通採芳醉卧
海仙宮裙腰點綴罇罍空但口鬢影搔霜風挽春誰有
回天力陽復從知六口極水邊野步迹斜影額上宮粧
流真色老根裂石石有皴伐柯未畏西河人本來面目
無一塵顧肯墮落桃蹊春鐘鳴漏下冰輪湧露洗橫口
走虛汞翠禽怯冷毛衣攬竹葉娑娑覺翻動口梧線折
不可彈簪抽碧玉卸鐵冠愛他清淡口他寒歲晚法眼
頻相看良工畫意不畫色淺抹濃塗覺超特冰魂會返
三生石古鐵敲詩唾壺側憑仗東風露消息

君不見處土西湖踏香雪千尺冰崖驚斗絕口橋橫跨
石路分屐齒硜硜醉中折幽鄉煖氣口與通春意初回

六六宮冰霜夙掃天地空首口紅紫千東風橫枝倒幹
勁有力造化胚胎豈口極清高與世異標體古淡於君
見顏色花光口筆不可斂月池借影模幽人緇衣久厭
京洛塵馬首忽遇江南春湯瓶沸水如潮湧道人眞口
流青汞玉樓凍合麈裘攬坐看紙帳香浮動口深呵指
將花彈矮虬攬落古籜冠有心傲世口怕寒請君雪後
時來看無鹽不愧深墨色風格如君儘奇特醉眠自據
醒酒石不記何人伺口側月落山空聞鼻息
君不見高士閉門三日雪林屋炊煙曉來絕口仙忽破
紙衾夢窻外鏗然老梅折何人爲把門戶通早春來自
青華宮天寒日暮巖谷空花信慰我初番風鶴邊拄杖

無氣力清境撩詩興何極蒼龍蛻壑瘦形影綠鳳窺叢
艷毛色老皮迸裂類斧斲平生要是鐵石人乾坤淨洗
無纖塵一白壓倒千林春冰澌流地山泉湧魚鱗滿澗
漂香汞剽幹過牆昂若攫素手攀條月痕動銀燈照壁
燼不彈對花獨坐仍衣冠夜深人地俱清寒千載只作
孤山看花工獨畀太古色百卉前頭總橫特顛崖下瞰
某盤石醉藉芳香茗爐側誰記蒼生望蘇息

友人募義成居行

君不見玉川尙有屋數間日高丈五猶鼾眠有時醉倒
桃李前縞裙練帨扶羣仙又不見萬松嶺上一間屋老
僧常與雲共宿有時雲去作行雨衲被攤床餘半幅柰

何君獨抱此高世才亦如昔人無地營樓臺轉蓬踪跡
半湖海置錐家世迷蒿萊平生氣魄青霓高眼孔滄海
大脚版不盈尺願欲狹天下天公罰作喪家狗頭尾偲
偲足悲咤旣不能浮家泛宅任昏曉太湖空濶風濤渺
又不能遺世獨立煙霞表通德矯痴節信小轉頭百計
不如歸蓋頭一把思終老手持尺疏干友朋詩社却憐
梳髻僧一毛在牯苟可拔半殼如蝸良易營良易營聊
偃息圖書倚靠相如壁兒女團圞火爐側精魂着體半
生過風雨閉門諸事畢焚香瀹茗日哦詩回向會中三
世佛

送霍山黃司訓任滿之京

黃於李同寅爲鄉晚輩暇日李飲子於寒

翠軒酒酣乞詩贈別且
話韻祈速就走筆一首

平生行止休問天順風且放南船先文章自惜醜月露
紙筆今喜揮雲煙功名分落鐘鼎後聲譽還出盧王前
世閒做帚笑禿陋宮中廣額誇新鮮有如黃子八閩彥
搜探百氏窮幽玄冲霄有翼起九萬失手一落坑深淵
鄉評物議每歎息彼蒼付與胡不然九年化育已雨沛
終古節操期冰堅茲行會見動朝闕陳說禮樂饒三千
江楓暮雨作離別使我戀注心旌懸年來不揣惜人物
一笑正像耘人田先生遺澤固有在門牆桃李羅春妍
亦知身境事俱了痛飲只合呼鯨川官船去去宦況好
望塵共羨班生仙

我媚四老歌

爲譚僉憲作

我眉四老頭帶黑總是我眉鍾盛脉我眉撐住西南天
四點金光炯周伯化爲太白稱壽星下與海寓開昇平
南山穹窿貌長在東海澄帖波不驚四朝全盛眼親覩
過箭光陰任飛度堦前橋梓峙來古鏡裏丹鉛照如故
綵雲扶護簾幙重廣筵習習飄香風舞場展影柳袍綠
慶觴照眼花枝紅大兒上祝千萬壽盡此團圞一盃酒
諸孫拜起聯奉觥醉倒花前亦何有里門觀者如堵墻
雙龍啣詔來金方冠裳熒熒耀蔗境珠綃爛爛明蘭房
我生已越古稀歲少見人生如許事酒酣落筆填壽詞
老眼雙揩作端字君不見老人村青城奧五十年齡只

稱少又不見岷江水灩澦堆千年撒髮曾不稀壽山福
海孰云遠分明只在渝川西吁嗟乎峩眉山山水窟山
巔草木盛春色自從三蘇奪造化至今月掩峩眉夕長
公久厭世千古仰遺蹟天生少眉公異世見標格少眉
之眉馬氏白攬轡澄清健風力功名會與峩眉高進向
明堂充柱石

張子興畫竹

和子興韻子興號平洲

平洲贈客無可以清興時憑管城子眼前兔鶻妙真訣
顛倒縱橫不踰矩虛心已見起實地勁節還看出柔指
巔毛爽颯半風雪墨汁淋漓萬煙雨高堂喚醒京洛夢
萬里湘江一張紙舜妃啼處行莫到清境何緣忽移此

平洲平洲我所慕便欲往致都史米醉酣丐掃聽雨堂
著我方床翠寒裏

徐主政大章椿壽歌卷

大章越人

銀濤浴日滄海東鰲山擁出蓬萊宮仙人手携綠玉杖
笑指壽域紅雲中琪花瑤草紛成列千歲蟠桃大於鉢
香風不斷花霧濛濛出人間二三月長生有籍仙晷閒
青鳥夜集海鶴還金丹九轉地騰寶玉女一笑天開顏
東山先生老眉髮歲晚看山健行脚座間歌舞盡日歡
月下蹲壘一時醺胸懷磊落百不嬰時有詩句和其聲
居鄉無競古陳寔積善有子今徐卿姓名藹藹夙通帝
花院依稀列名位帝令久視天地閒坐閱桑田滿千歲

九
郎星夜動使節揮白雲未榜心先飛會稽晝錦照人眼
四山草木生光輝高堂廣幙羣仙醉玉樹亭亭表人瑞
詔黃入戶寵墨新手挽雙龍落人世先生福祉未有涯
我生氣誼求通家他年海上扣服餌會見巨棗如瑤瓜

白羊蔡山人七秩歌

蔡主政乾之
父湖湘人

春暉堂上長生酒二月東風盛花柳湘中老人兩頰丹
笑倚仙桃慶開口紫泥鸞誥來九天鴻恩昭揭雙龍懸
烏紗一幅照湘水地行人道壺中仙橫霄有子近天日
忽望白雲歸思急袖將補袞五色紋製作斑衣繞雙膝
朝來赤壁聞笛聲風吹南鶴雲冥冥瀛洲昨夜報消息
海山福算齊千齡方瞳如漆洞南紀九點蒼巒紫煙起

他年更看道氣騰一劍飛凌洞庭水

漁隱老人六秩歌

青山綠水花溪東誰其隱者溪上翁翁言生長太平世
婚嫁了却身還慵脚跟謝絕縣前地海月江風却相契
酒空瓦缶更浩歌舟閣寒灘正鼾睡灣頭蝸舍小於斗
六尺絲竿長在手有時水面逐腥風斜日鳴榔共溪友
年來光景踰六秩兩鬢絲絲盡成白渾家兒女進壽盃
醉眼時時看山色養生有道外禍機青天不遠已獨知
古來修短皆由命牽犬唳鶴元人爲請君罷說皺眉事
少喜風花老知忌水雲今是白雲鄉且閱滄桑到千歲
君不見武陵源與塵寰隔流水桃花幾今昔前身曾是

問津人會見招延作仙伯

壽朱大行之母

時十一月也

馬頭十丈京洛塵惜哉職事羈縛人江南風物記不真
白雲夢想勞心神詔黃堆墨濕且新星車遠使湖湘濱
松江秋興牽鱸蓴歸裝暫慰慈顏親高堂花月值誕辰
玳簪雜還來佳賓銅虬炷香開口噴舞鞋軟襯氍毹茵
饗人絡繹送入珍麻姑擘脯烹麒麟盪船醉玉東西陳
碧桃破雪天回春錦袍有子陋買臣笑酣王母瑤池津
九峰對峙何嶙峋海波倒卷濤山銀壽山福海祝彼旻
鶴書爲我來干巡

靜庵孔先生挽歌

寒雲漲空日色薄千里書來哭聲作霜風一夜摧老椿
鶴帳猿庭總蕭索平生兩屐不到頭身前身後俱休休
梅花已謝素琴手月明空到藏書樓天涯游子盈襟血
忍見萊衣納塵篋音容一逝不可返只有中宵夢相接
佳城鬱鬱望孔林水聲東去悲人心龍光他日賁松梓
會看高冊銘碑陰人生百歲須有子千古衣冠幾曾死
君不見墓門寒食集兒孫滿道梨花護春雨

吳約齋挽歌

長江東馳白日暮水國僧鐘忽傳訃哭聲夜激鐵甕雲
旄影秋翻鶴林露壯游曾曳王門裾老懶却笑愚公愚
江山千古足登覽花鳥百歲期歡娛孰知老色不可退

奄忽目光雙落地空山有子慨風木遠道無人奠鷄絮
匆匆萬事付結裏秋草城邊一坏土海門月落人不醒
兩岸青山自今古

雙輓引 韓通政考妣

夜天昏昏漲雲霧蕭索悲風撼窻戶中庭有椿已抱愁
況復萱花萎朝露高天厚地何所容祿養莫獲伸情衷
啞啞反哺愧烏鳥血痕灑向枯枝紅雙龍誥勅生前寵
萬里銘旌身後塚生存零落竟莫知木落高原水泉湧
墓廬歸卧青山隈白楊風起鳴聲哀杜鵑有淚哭寒食
野田斜日棠梨開

懷松

大松當軒矯且直聳壑撐空幾千尺小松偃蹇十尺強
四時翠蓋停山房松閒一人事高格醉踞平泉醒酒石
耳邊笙鶴作清聽手撫龍鱗遣長日佳城一閉近十秋
生前華屋今荒丘蒼髯寧復拂拄杖金粉空自沾衣篝
寒濤夜半欲翻屋之子哀淙感風木起看明月掛虬梢
尙想眠琴對懸瀑小軒有榜書懷松九泉無路追音容
遙知孤枕五更夢迴繞萬壑千巖中青山鬱鬱白雲曉
我欲沿松拾瑤草憑君揮手戒爨童愛惜蒼陰且休掃

慕椿

西風號號徹長夜百尺靈椿忽殂謝寒燈土枕逾十年
秋雨時從寸腸下芳華於世能幾何轉頭老色來相磨

九天雨露甫看近百旬霜雪何其多枯枝灑遍啼烏血
天地無恩春意絕傷心只有北堂萱長向蕪庭守孤月
關山南望淚盈袖三十功名豈人後里門有帖報泥金
泉壤無光燭衣繡哀哀情事翻作喜國典推恩到生死
墓門行見刻碑章一道龍光照松梓

褚氏同歸挽歌

爲褚鳳臺推府作

燕山百尺靈椿老謝砌光風馥萱草樓臺十二附帝鄉
長日紅雲護瓊島高堂廣幙啟壽筵東風花柳羅芳妍
仙郎出手奪宮錦製成綵服春翩翩雙龍遠自九天至
七品星階躋郎位已看綬墨副烏紗更喜冠珠照霞帔
清時行樂未有涯忽驚秋慘凌春華霜風次第入庭戶

芳叢相繼成枯葭青霄有客淚盈睫灑向縷裳作殷血
五更唳鶴怨零露半夜啼烏守殘月春山福地牛恰眠
漆燈有穴差無偏藍田合璧一時瘞豐城劍匣還相聯
人生值此甚奇事借老同封復連逝未夸史筆表銘旌
自信仙山列名次中台更報歷階早快意從知古來少
榮光重疊照泉臺不獨人區耀華表

又題竹溪六逸圖

清溪曲曲山蒼蒼老竹一片藏山莊綠陰窻几敞晴晝
坐使人地俱清涼蘭亭曲水久陳跡竹林吹向山陽笛
溪山風月不放閒盛事還看六賢集翰林風神迥高秀
巢父掉頭却塵垢韓裴落落下鷄羣陶張表表差牛後

又罟空口將安施君不見禹門千尺鼓桃浪點額未歎
風雷遲又不見釣臺一片俯清影直鈎但欲心口怡世
閒進止各有識嗟此堪喜尤堪嗤校人口莫眩機巧洋
洋圍圍還從伊

水南集卷九

文前自不其... 子其... 然... 然...



水南集卷十上

明德清陳 霆聲伯著

詞

摸魚兒

悼鸚鵡

向東風紅銷翠菱傷心成甚情緒護寒簾幕終何用花
病早知來處春也妬全不管畫堂冷靜人難度高飛有
路仙夢去多時玉繩金柵空鎖綺窗霧鴛鴦會惆悵
佳期又誤琵琶有語誰悟香殘紅稻珊瑚顆愁與淚珠
同墮還寄意永別他隴山千古青青樹梨花院宇重想
念新詩日高惟有鶯燕自來去

水調歌頭

己卯初度

著書鶚冠子倚杖鹿門翁十年正堪一笑夢覺大槐宮
早是年開五秩便待人生百歲雙臉再難紅試問輸銅
臭何似作詩窮道根深俗緣淺世情空仙山久扃花
院名位夙相通安事舞衫歌扇自喜薰爐茗碗況味野
僧同天獨與爲壽秋滿菊花叢

念奴嬌

墨芙蓉

孤芳無主被西風送與一天愁色顧影含羞還有恨口
筆怎生描得蘋白如矜蓼紅自倚真意誰能識影娥池
古晚妝猶賸香墨惆悵別浦芳洲水雲靜處珮冷菱
歌寂幽夢偶隨歸燕化荏苒烏衣消息濁世堪驚緇塵
易染清淚空狼籍江南望斷一痕月照涼夕

滿江紅

以下四首皆致仕歸作和呂居仁

蕭散東歸天應賜茗溪一曲江村上春風酒旆夕陽漁
屋放浪水雲明月地醉歸船重成頽玉更看他曉鏡照
菱荷雙鬢綠 秋聲早窗前竹秋香晚籬邊菊把浮雲
勘破世閒榮辱獨擁黃紬無別夢日高春睡方纔足起
來時誰伴立芳洲沙鷗熟

摸魚兒

和晁無咎

遍江南綠茗芳草春光又回南浦溪堂夜月無人共時
有釣船移聚風靜處眼送他一灣碧玉從東注村歌帶
舞任白眼看天玉山倒地鷗鳥自來去 青鞋底且向
山林穩步風花勘破虛誤桔槔智巧終何用抱甕不妨

農圃還試覩滿江湖風塵瀕洞今如許身心自語歸得
便須歸杜鵑聲裡斜日灞陵暮

沁園春

和辛稼軒

一事無成百念堪驚嗟歸去來算山陽笛裡十年風雨
邯鄲道上千里塵埃貴賤同古今流水試問榮華安
在哉秋江上但月生月落潮上潮回天教老向茅齋
把風月胸襟對客開更綠陰畫舫醉殘坡柳暗香詩屐
尋遍逋梅高竹秋聲長松午影留箇山崗次第栽閑中
看這歸休也好何用徘徊

滿庭芳

和蘇東坡

戰蟻柯邊鬪鷄坊口看來一片虛忙漢何仁義楚豈盡

剛強剛道偶然成敗被人笑持論疏狂君應看眾人拍手鮑老獨當場
分明都是戲儘教塗抹我又何妨便將何變得鶴短鳧長擾擾唇鎗舌劍是非口一任蘇張
歸途好風光滿馬春草雨餘芳

蝶戀花

題覺海寺壁

一線功名牽鼻住百歲閒身賣向匆忙處暮鼓纔終鷄
又起空教老盡閻浮世又是碧山無絕意白羽青鞋
容我來還去坐個蒲團拋箇偈世緣都付齁齁睡

漁家傲

志漁卷

七尺頑軀多少事浮生沒個閒田地借得桐江絲一縷
憑君計要將白日竿頭繫水一笑水雲忘世味五湖是

我安身處夢在滄洲家在水醒還醉任他海月空來去

清平樂

書聽雨堂壁

清時有味不涉塵中事狂舞酣歌高枕睡更問神仙何處
從來春夢無多世途何苦奔波皺着雙眉則甚放
教一笑如何

滿庭芳

陶潛撫孤松圖

短杖東臯濁醪西舍吾生樂在田園良苗秀雨生意藹
晴川長日柴扃不掩濃陰散柳外榆前山林好意行無
阻琴在也無絃爲生消幾許區區五斗未當三餐算
折腰非易解印非難落落長松共晚塵埃事有夢誰關
無心處閒雲自出孤鳥自飛還

踏莎行 踏雪尋梅

密雪和雲層冰匝地關山歲晏無來使早芳知有野橋
春吟鞭料理西湖事破帽多年敝袍無絮酸風故故
欺驢背溪山十里正清寒梅花却在清寒處

醉江月

送人之南雍

都門曉靄做涓城朝雨贈人行色長劍橫秋天地小匹
馬臨風跑立布袖天香錦囊詩句壯觀京華客江南去
去月明應望江北天意未賺英雄試教回首青史看
陳迹燈火橋門三載事晨鏡尙誇頭黑鵬鶚秋霄魚龍
春浪氣滿風雲臆住君一醉碧山正未西日

漁家傲

釣月

薄晚煙林收紫翠澄江皓月秋無際六尺釣竿隨手製
絲綸細流光動處魚龍避試問雲臺成甚事直鈞自
適閒中趣夜靜水寒慵久空歸去西風夢到蘆花被

風流子

送人歸吳中

天涯孤客夢西風晚吹入搗衣秋念故國情多書成織
錦敝袍塵滿賦就登樓寸心急曉同雲北下夜逐水東
流寒鴈數聯暝烟千里短鞭去馬長笛歸舟都門樽
酒後相思渺雲樹兩處悠悠爲遣中宵明月隨到南州
向溪亭蒼靄寄聲脩竹野塘春煖致意沙鷗備我一蓑
煙雨老景滄洲

水調歌頭

庚辰初度

紫髯世外客玄鳥地行仙歸來厓頭屢改鬢影只青年
那有貴官氣象不脫書生風味坐榻冷無氈要識心中
事白眼看青天 算人生名易遂節難全紛紛金紫一
生歌舞在華筵留取胸中正氣俯仰人間今古雷電隱
晴川一笑又初度聊爾當詩篇

蝶戀花

同前

客子光陰詩卷裡過了燒燈又報花朝至回首小樓聽
雨處杏花春意知誰主 牢落征途行未已簇簇長亭
官柳搖旌旆孤悶夜來添不寐短篷江上風和雨

水調歌頭

許啟中使交南

銀河動清曙玉宇湛高寒手招黃鵠曉騎風露下雲端

借我金門仙客去作三清使者星珮落人寰笑指炎荒
路一髮認青山 覬宮袍風采異日華鮮珠霏玉灑布
宣德意笑談閒獨倚橫空一劍俯仰乾坤萬里東望海
波閒白雉看重譯聲教訖夷蠻

齊天樂

至六安寫懷

秋風千里騎黃鵠翩然白雲南去芳草閒情漚波醉眼
一枕蒼寒留住清時有味儘棋局坐忘茶甌相對百首
新詩江山風月助奇思 功名自來浪許道炊煙未散
叢陰無處磨蟻嫌貪竿魚訝冷一笑晚山橫翠閒門靜
閉任蝴蝶上堦雀羅張砌夢落朝班日高慵未起

蝶戀花

春歸

池上落花紅作陣池外濃陰總道垂楊悶春意自憐芳
意盡風風雨雨歸期近 淚眼惜春還可恨來不多時
去又無回信芳草征衫何處認楊花只亂人方寸

水調歌頭

梅竹芝草圖壽人正月十五日誕辰

金芝騰地寶瑤草動春芳中庭乍消殘雪和氣轉東皇
花市收燈未久柳陌踏青將屆樂歲好風光指點泰途
近身在詎須忙 儒家氣方家業道家裝膝前綵衣圍
繞袍錦晝輝煌坐我蒼筠萬畝壽我紅梅百本纔足了
千觴一笑領黃鶴回首望仙鄉

長相思

秋懷時寓都下

風色愁雲色愁做造關山鴈字秋寒衣今到不 望京

樓望鄉樓一點相思兩點眸吳峯天盡頭

踏莎行

葵花

濃綠池塘薰風時節石榴過了薔薇歇黃簾照映錦葵
春紅情綠意猶三月草木孤貞太陽嚴烈丹心傾寫
渾如血卻慚飛絮逐東風一生惟作漫天雪

清平樂

風雨歸莊圖

石田茅屋老去安耕讀門外春風芳草綠容我倒騎黃
犢前村風雨催歸垂楊吹斷柔絲兩手按翻箬笠一
身抖亂蓑衣

風流子

謁告歸題冊中

野渡少人來斜陽裏閒着濟川材儘滿目雲山伴人坐

嘯一川風月留客追陪還看取宦情容易淡詩句浩難
裁紅樹酣秋綠萋霽晚洞庭霜冷笠澤雲開 徘徊空
自信怕煙波未許鷗鷺私猜回首日邊京闕清夢相催
笑此生真負羊裘高潔幾時得洗馬首塵埃唯是初心
一點飛想歸哉

滿江紅

書京口驛樓中時爲候舟不至故也

官柳參差春城迥驛樓高出闌干外遙山數點斷雲千
尺斜日半江鳴去櫓落梅滿地悲長笛念有誰撫景獨
傷神天涯客 江南使無消息桃葉渡迷踪跡渺孤舟
何處水雲遙隔鴈後坐看行計晚花前不柰離愁積問
幾時天意借周郎東風力

齊天樂 駐節寧親卷

東風江上梅花路仙舟載將春去使節龍函宮袍獸錦
光滿晴川行處飄飄意氣儘騎鶴雲端泛槎星次一點
稽山蒼寒落枕海門曙九重馳來香幣報皇華事竣
白雲情繫喜集萊衣慶鍾壽筭花月樓臺十二夕陽正
未看雨露芳容椿萱交翠醉眼蓬萊海波清見底

西江月 白扇

袖裡琅玕十二筆頭風月三千素娥宮闕正高寒我欲
乘鸞遊覽談柄未輸玉麈醉筵初破冰盤晚涼揮酒
水亭閒人在瑤池閬苑

念奴嬌 赤壁圖用東坡韻

三分鼎峙算江東雖小儘多人物一片江山千古恨崩
浪怒衝高壁湖海孤臣經年放廢破帽撐風雪浪遊懷
古問君誰是豪傑 駕此一葉扁舟舉盃屬客清興樽
前發凌涉滄茫三萬頃洗蕩几塵消滅夜靜江空洞簫
清潤露氣侵華髮仰天一笑醉中臥對明月

臨江仙

芙蓉

蓮褪紅衣蒲稗老西風吹冷汀洲翠羅簇護錦雲稠借
來三月景點破一江秋 鷗鳥不歸沙嘴靜孤芳自覺
含羞柔枝裊裊影悠悠浪中蓮唱杳煙外夕陽愁

魚遊春水

用宋人韵謫後寓客邸書懷

春寒重門裏試借珠簾遮燕壘管絃巷陌記得去年羅

綺芳草閒愁月一痕游絲斷夢雲千縷身世無憑年華
似水 九疊屏山悶倚一夜東風謝桃李日高猶苦春
醒未忺梳洗別離情緒傷啼鴉相思尺素煩雙鯉長亭
十里客心千里

水調歌頭

丁卯中秋醉後大書

乾坤容我醉風月放人閒倚天長嘯斗閒紫氣劍光寒
誰管功名兩字自要煙波萬頃去把釣魚竿回首塵埃
事一笑請君看 十年前鑽蠹簡戴儒冠致君事業平
生撫掌道非難爲問羊裘高興比似鑿坡簪筆終古笑
辛酸拂袖理松菊浩氣壓雲端

齊天樂

送何太守考績還任

梅花吹老城頭角銀河漸看清曙仙掌雲開宮壺露耿
月轉西樓十二都門曉騎指煙靄蒼茫長亭官樹袖有
天香春風馬首散和氣九重璽書褒美道周家南伯
漢朝循吏零雨自東棠陰向午夢返湖山佳處巖廊虛
竝報竹馬謾懽微車垂至回首東華沙堤新築起

清平樂

春寒

芳辰能幾一半歸風雨冷落鞦韆深院宇雙燕飛來愁
語畫堂人靜簾閒寶爐放近屏山憔悴不成情思杏
花連日春寒

水調歌頭

送包錄事歸省

江山憶故國煙月阻同遊西風搔首夕陽歸鳥望鄉樓

十載紅塵春夢千里白雲情思身世浪悠悠歸路辨行
色雁字海天秋 碧瀾堂山色近水光浮畫船載酒花
時福壽滿金甌醉擁笙歌十二光映壽星兩點袍帶總
風流從此茗南景應作畫圖收

踏莎行

晚景

流水孤村西風古道槎牙老木昏鴉噪夕陽倒影射疎
林一時粧點秋容老 樹暝寒煙天低衰草登樓望極
雙眉小欲將歸信問行人青山盡處行人少

燭影搖紅

賀大司馬許老先生華誕

雲臥東山口碑薦牘知多少江湖心迹廟堂憂雙鬢西
風早霖雨神功未了慰蒼生謝安江表金湯萬里紅燭

狼烟綠肥塞草
嵩嶽鍾靈三朝重望推元老鼎中龍
虎鍊容顏松下龜蛇小蘭玉庭皆春好儘宮袍膝前圍
繞一卮壽酒數點榴花畫堂清曉

蝶戀花

潞河萬安寺

流水橋邊楊柳樹淺綠輕黃掩映清涼寺一片春光藏
不住杏花殘月梨花雨 客子閒愁推未去兩屐芳泥
來覓題詩處槐火石泉茶有味夢中記得三生語

醉江月

月川

長川夜冷瑩琉璃千頃平鋪寒碧誰放清輝收密靄點
入一輪蟾魄歸盡漁舟響殘菱唱露氣零秋白更無風
浪水天相映一色 驚見墮壁遺珠交光上下清處無

人識喚起馮夷裁匹練摹取廣寒真蹟便欲披襟馭風
乘氣醉訪騎鯨客一聲長嘯水宮驚動龍螭

臨江仙

柳詞用宋許伯陽體

不見漢家營內柳絲絲輕拂旌旄將軍以逸待人勞馬
騰士飽枝上掛弓刀鐘鼓令嚴良夜靜梢頭明月初
高翠華臨幸事都銷先春芽縷尙想赭黃袍

其二

不見西湖堤畔柳弄晴十里依依暖風搓動綠煙絲似
同蘇小雙舞鬪腰肢憶昔六橋經鳳輦擬爲春暗龍
池畫船維處恣遊嬉斜陽煙靄誰管斷腸時

其三

不見吳王宮外柳濃陰
低映鷗沙屨廊春響笑仙娃
東風眠起臺榭總芳華
一夜長堤馳越騎柔條無力攔
遮荒城留與後人嗟
尙餘故態煙外舞敲斜

其四

不見章臺街上柳纖勻
初畫雙眉輕盈婀娜惹遊絲
少年走馬花酒戀芳菲
千里心期歸較晚長條不似前
時東風似與解相思
多情時遣飛絮點春衣

其五

不見太師橋下柳綠陰
搖蕩雕甍朱門甲第管絃聲
沙堤十里香絮滾春晴
驚起胡塵青眼眯秋風
禾黍神京
嬌枝嫩葉嘆飄零
夜深荒址時見度流螢

醉江月 中秋上劉太守

南樓今夜恍人間天上不知何夕魚浪纖雲都捲盡萬
里明河一色仙桂扶疏羽衣涼冷人在清虛窟嫦娥過
我飛輪碾破秋碧 太守東閣初開風流樽俎催召西
清客未要銅盤燒絳炬自有清輝飛入潦倒詩狂婆娑
酒態醉舞嫌天窄塵心洗淨玉壺報道敲側

漁家傲

兩牧子騎牛晚渡

沙上行行人漸少一聲斷角譙門杳煙靄微茫籠樹杪
斜陽倒亂鴉數點青山小 人正饑來牛正飽驅鞭懶
顧平原草兩兩絕流歸去好寒塘悄西風吹雪蘆花老

水調歌頭

中秋

仙風清玉珮香霧藹雲鬟紫臺招手醉騎白鳳上高寒
曾記五雲深處縹緲瓊樓十二寶界晃三千回首人間
夢一落忽經年羽衣輕胡牀冷洞簫閒肺肝冰雪孤
光一點最相便可是嫦娥有意付與嬋娟千里今夜儘
人看起舞答清興歌罷唾壺殘

踏莎行 九鷺圖

秋逼銀塘涼生玉井蓮衣破裂西風猛白蘋深處晚歸
來汀洲一片山陰景幾點雲輕數聲煙暝聯拳啄碎
澄波影夢魂清斷夜三更一江明月蘆花冷

燭影搖紅

中秋後三日與李京兆夜飲投壺醉後有作

脩竹閒庭鏗鏘金鐵秋聲滿是誰閒氣校輸贏花影頻

頻轉常記雅歌催版想軍中裘輕帶緩江湖今喜飛燕
名聲插花盃盞 身世飄零天涯歲月驚秋晚百金交
誼古難尋共看松筠暖可是穿楊技短早樽前心寒手
軟珊瑚擊碎感慨悲歌夜蟲悽惋

醉江月

桂巖

素空霽雨聳芙蓉千仞蒼巖高出涼浴山河風露下冷
浸一枝秋碧芳影婆娑天香縹緲散滿詩書室有人吟
颯恍然身世清特 聞道絕頂凌霄梯雲有路相近蟾
蜍窟玉宇瓊樓盈尺五寒氣逼人毛骨金粟侵衣檀薰
着酒引上登仙屐嫦娥微笑手中擲下三色

水龍吟

梨花和周美成韻

醉顏消盡東風一枝迥出紛華地暖香吹雪淡粧欺粉
羣芳羞避靜院無人閒庭轉午重門深閉倚闌干無語
玉容寂寞爲滴盡傷春淚愁到黃昏時候漏聲沉隔
牆歌吹疎簾淡月離懷喚醒夢魂驚起細雨廉纖輕雲
低娜不禁春意算東皇獨付清標正好與梅花比

念奴嬌

雪

封姨忍冷把彤雲剪碎滿空拋撇萬點青山頭忽老人
跡鳥飛俱絕歌館迷紅粧樓失翠四顧成銀闕晚來江
上漁蓑歸帶香屑對此應慕山陰扁舟興盡空載黃
昏月歸到溪堂門未掩別有一般清潔雪印梅花梅橫
月影三白交相合紙窗光映夜明不怕燈滅

念奴嬌 三忠廟祀漢諸葛宋岳武穆文文山

乾坤易老嘆風塵飄蕩河山分裂名分綱常都掃地會
有何人提挈身翊飛龍氣吞胡馬赤手扶天闕精忠照
耀一時名並日月須信天理人心自來不泯千載思
遺烈廟貌燕山崇祀典華表三忠新揭西北中原東南
王氣回首驚風雪傷心行路不堪日暮時節

水龍吟 七夕和施西亭

水花亭館初涼月痕照在葡桃架星期此夕針奩未啟
蛛絲先掛虹斷東樓雨收北渚露盤清瀉望湘簾起處
果筵初設兒女輩花相亞縹緲行雲低度耿河津仙
輶飛駕鵲纔傳喜蟲還催織欲留無暇又是匆匆離腸

中斷幽歡空罷嘆天長地久迢迢一水兩情終夜

燭影搖紅

子規

落日空山暝煙赴處行人絕爲誰攜恨到江南泣盡枝
頭血最是五更寒徹一聲啼一聲悲咽紗窗驚散蝴蝶
遊魂梨花香雪纔見飛來料應未是經年別吳山不
減蜀山春何事思歸切回首綠陰成疊早東風落紅時
節閒情最苦一春無緒寸腸千結

醉春風

子規

綠滿汀洲暗天涯芳草遍年年何事叫東風怨怨滿
樹梨花半窗殘月夢魂初斷血染山花片聲動鄉關
念玉窗應是數歸期賺賺回首衡陽鴈飛不到寄書

人遠

瑞鶴仙 壽詞

芳塵纖雨過正紫陌春光二分纔破細桃夜口吐障東
風臺榭錦雲如堵庭幃煖和喜清鏡口年初度捲珠簾
笑語生春絳蠟玉花雙股口賀畫屏影裏寶篆香中
神仙無數履侵烏口口衣舞縷衣歌藹高堂喜氣祥煙
繚繞人在蓬萊洞府願年年酒滴花前醉顏如故

蘇武慢

悟俗用虞邵庵詩

世事如棋人情似紙弄巧幾多成拙青春易過白髮無
情轉眼光陰消歇樂在其中心遊物外此理幾人明徹
蕩虛空無去無來惟有清風明月誰似我劍走青蛇

髮衝烏帽長嘯一聲天裂脇生八翼足跨三天歷遍廣
寒宮闕衣剪雲霞珮懸星斗容我玉清朝謁挾飛仙下
視塵寰紅日片時殘雪

沁園春

章子仁頻歲遠遊誕辰乃秋初也繼又促遊嶺表故兼致如此

兩鬢星霜兩腳風塵老矣吾生記燕山曉別雪中驅馬
秦淮夜泊月下聞箏獨鴈辭秋孤燈聽雨身在江湖輕
利名從今算又十年心事屈指堪驚天開五十昌齡
人道是南方一壽星向虹橋影下應期烏鵲冰絲彈處
訪舊湘靈稅地栽花解貂當酒此去情懷尙可能明年
也盼口花消息嶺表歸程

臨江仙

扇面

粧點吳鄉秋意老夕陽紅樹離亭晚江潮退水痕平兩
行征鴈相約下寒汀釣餌絲綸收拾了蘆花深處舟
橫西風吹面酒微醒起來船尾坐看遠山青

蝶戀花

夏日遣興

晝宇閒閒簾着地亂匝桐陰人在清幽處煙裊畫屏沉
縷細綠窗一枕芭蕉雨殘睡覺來無意緒雨後斜陽
照在庭前樹浴罷晚涼掀短袂清香滿院荷風起

沁園春

秋坡

買斷青山占住白雲豈不佳哉儘夜枕商聲蒼筠繞夢
晚庭詩景紅葉成堆老鶴松陰流泉磻道付與閒藤日
往來行吟處見石田齊熟籬菊新開有時落日林隈

聽牛背西風一笛回更露洗疎桐烏啼金井月寒老桂
人在琴臺芋栗供貧菜蕘備釀生計年來手自栽清幽
甚笑落花流水春漏天台

醉江月

日休取山谷四休之意

容身何處有青山借我一丘一壑穩坐籃輿橫曳杖十
里西湖行樂春筍齋厨午茶盃盞蓋世味從他薄大都幾
屐安閒便是丹藥隨分吟倚西風醉眠蒼石心與浮
雲約回首紅塵名利事勘破蠅頭蝸角萬卷藏書百竿
栽竹有子承當着乾坤老矣一簪聊寄華髮

天仙子

秋景畫

江上青山山下路茅屋人家臨水住雨餘一片夕陽明

汀草處鷗來聚一葉漁舟橫野渡
煙霧紛紛生古樹
樹底寒流橋欲墮行人千里未能歸還自苦愁無數
楓落吳江秋正暮

點絳脣

漁舟吹笛

碧水澄秋絲綸捲盡斜陽影小舟維定蓼岸西風冷

橫管孤吹有調無人聽長江靜眠鷗驚醒衝入蒼煙暝

醉江月

梅月畫

月香水影記西湖曾踏六橋殘雪回首江山今在否詩
被夢驚秋鐵鶴老蒼苔屐閒青嶂僧寺茶煙歇被花相
笑十年何事輕別誰道逋老風流丹青有手千里神
相合月又朦朧花又瘦還是黃昏愁絕小殿粧奩寒城

畫角催老花時節天涯搔首霜風吹斷華髮

前腔 輓玉田李先生

乾坤擾擾算人間換了幾番華髮一夜雪痕埋短屐不見玉田行樂鶴夢難醒梅魂未返詩景誰商略溪山無主西風千古寒索南望十里龜山牛眠有塚草樹迷狐貉一滴重泉知道否有酒無人同釀今古斜陽往來樵牧枯木寒鴉落臨風懷感登高時望城郭

蝶戀花 謫所偶成

春燕秋鴻驚節序曉鏡朱顏容易成憔悴花落花開人世事閒愁一點無安處飽後高眠醒後醉眠醉工夫正合閒中味一笑不知南北異小屏疊疊吳山翠

蝶戀花

用宋秦淮海韵言懷

鐘鼓樓頭昏又曉，馳隙流光，易向忙中了。消得多情天
亦老，鏡中雙鬢成秋草。白鳥正多人正少，身世江湖
夢裏邯鄲道。望斷平蕪江樹杳，歸心一點孤帆小。

蝶戀花

春暮旅懷時正德四年也

雨雨風風花事退，芳草愁痕，綠遍長亭外。辛苦杜鵑流
血淚，碧山春盡行人去。城上樓高休遍倚，煙柳斜陽
總是傷心處。一點柔情風裏絮，遙遙去度長江水。

蝶戀花

謫所春暮偶書

流水落花春不管，世路悠悠，回首天涯晚。悵望江南人
又遠，斷魂零落屏山掩。愁懶漸添歡笑減，病酒經旬

腰帶新移眼燕子日長春夢短東風門外楊花轉

醉江月

和宋人劉改之韵

區區世道算紅塵何似水雲寬處雲夢澤南攤睡簟曾
是舊遊之路城老芙蓉臺空簫管下界多風雨羣仙相
笑問人何事勞苦自要天柱峯頭仙人洞口著口臨
長句寶帶萬釘成甚用到了終歸黃土籬下黃花山中
白酒秋意須人主愁心無奈江南有夢歸去

踏莎行

細桃鴿鴿

旭日亭臺煖風園藥雙雙飛上細桃樹可人鸚鵡隔重
簾春聲故遣驚春睡金彈偷拈雕籠半閉花間別有
藏機地回頭相顧各驚飛畫闌簌簌香紅墜

清平樂 贈瑞巖觀解道士

尋真何處來到桃源地滿路松花金粉墜時有白雲來
去 洞門小扇初開一雙玄鶴迎來請去先生雙屐莫
教踏壞蒼苔

行香子 書泗洲南山石壁

野景晴川白鳥蒼灣向滄浪一洗塵顏水拖衣帶山結
螺鬟聽步虛聲鐘梵韻翠微閒 市樓一片客帆千幅
問何人到老心閒秘書謝事司諫歸山見夕陽中雲卷
盡鳥飛還 泗洲南山卽坡老與泗守舊遊處有行香子
鐫於石崇寧間磨去已巳歲以公事至泗公
暇得遊追感舊事爲和
此山有瑞巖觀龜山寺

摸魚兒 春寒

悄無人杏花院宇終朝冷清清地春陰只在重簾外春
意不知何處門也閉早不省峭寒陣陣從何至翠幃怕
啟鸚鵡噤無聲香篝宿火知是甚天氣風頭轉窗外
紙鳶飛墜麻家節候難據天公作意妨遊事羅綺未教
輕試閒議擬枉教他垂楊惱亂絲千縷無情燕子失了
探芳期風風雨雨天也會憔悴

畫堂春

春院
晚景

新晴庭院晚香遲柳梢先有鴉棲東風特地報花期吹
進簾幃芳信未來燕子春寒猶泊羅衣落梅砌上月
痕移人立多時

錦堂春

杏花

風色晚來庭院雨聲曉上簾櫳無言有恨何人會斜倚
粉牆東立仙苑盛誇年少孤村遙指春紅京華舊夢江
南路回首夕陽中

西江月

紅梅

春色十分相似清香一種元高剽枝參出杏花梢攔住
風光多少風仙骨已經丹換冰魂仍用□□九霞觴底
醉春宵回首月斜天曉

滿江紅

春陰

□□東君將如許韶光藏疊無聊處冥雲酸霧□□淒
切刺繡窗紗終日暝搖春花影經旬減□□風剪剪作
春寒侵曉褐雙門外重簾隙□□雨濛濛月悵芳辰

變做苦秋時節水氣暗□楊柳線林煙冷裏丁香結算
栖栖梁燕獨愁□□誰說

滿庭芳

折桂枝

□□流輝露盤承爽霽天涼氣初浮一枝橫碧□□亞
瓊樓可是嫦娥過我天香好濃染衣篝□□下流霞共
吸金粟滿冰甌 分明天上種□□應避梅粉還羞記
少年得意仙府曾游回□小山招隱攀援處歲月空留
還相慰瑤瓶淨水□近素屏秋

驀山溪

竹隱

□山繞屋流瀑沿堦砌中有百竿雲掩衡茅四圍交翠
清風滿徑掃退馬蹄塵呼茗碗撥薰爐□□壺觴醉

浮生最擾認取閒田地風月不□□更涼雲逼人清思
籜冠落後支枕聽秋聲□□悄洞簫沉夢在蒼寒處

漁家傲

飛鳴宿食鴈圖

□□秋雲雙縷度江天叫雨空濛暮夢落寒蘆□□寤
回頭顧稻梁差認年時路□霜信卻傳□□誤淚彈箏
柱紅冰墮望斷湘雲山更阻愁□□歸期長是燈期過

滿庭芳

蒲窗號

□□分奇湘雲剪潤小庭巧貯玲瓏瑤盆淨水□□曉
青葱生意盛沿蒼蘚清寒地隔遠紛紅□□焜翠光淨
洗況在雨聲中□會心誰有夢□□詩境移進簾櫳算
幽蘭香芷氣味相同九節□誇仙杖靈苗散綠玉茸茸

清閒好爐烟一炷□近素屏風

賀新郎

張大尹
考績

□□催行色見沙邊紅旗旋捲青山瀕夕一舸□□辭
雪水載取月明陪客千里夢早趨京國枳棘本非鸞鳳
地算此行少展鵬鵬翮仙棹穩□□急五雲縹緲飛
雙鳥望金門彤光向曉□□達尺勳業不須重覽鏡太
史備書嘉績還□□絲綸褒錫爲報茅簷林□煖計東
風難駐行春跡占後祿自今日

喜遷鶯

送侯倅擢
太僕丞

采菱風起正一葉井桐乍驚秋雨馬首紅旗鷗邊畫舫
光滿白蘋洲渚點點道旁涕淚戀戀樽前笑語傷離處

奈陽春有腳湖山無主
堪喜三千路身上紅雲雙佩
春風裏紫塞防秋彤廷立仗馬政會看興舉漢遣屬車
陪從周有命書付委從今後勳階臺閣服章金紫

木蘭花慢

賀鄭大尹膺獎

算江南樂地山城好稱鳴絃正柔徑雉馴花村犬臥麥
隴牛眠天公更憐饑餒遣我侯早晚散炊煙瓜棗頓還
幽俗鷄豚屢慶豐年 璽書曾記漢旌賢藩省代天言
道三異化行七絲政好六事功全摩挲舊時鳧鳥看相
將飛上五雲端河內空煩借寇道旁行羨登仙

前腔

思萱卷

記紅芳退後蘭階下綠抽簪漸葉展鸞翎花含鳳嘴影

亂槐陰宜男自來入咏早薰風長養北堂深好是綵衣
壽酒一枝照映釵金 中庭無奈雪霜侵風木忽哀吟
嘆光景無多芳華易殞冷淚盈襟傷心藥欄西畔但斷
機殘月尙如今總道春暉難答年年寸草萌心

蝶戀花

新綠汀洲芳杜暗渺渺春波斜日江南岸去歲送春微
有歎今年春去渾腸斷 蜂蝶無聊鶯也倦冷落西園
飛蓋朝來散落盡庭花人不見垂楊空鎖深深院

鵲蹋枝

漁樵閒話

三十年前真是誤駒隙匆匆塵土長安路贏得閒身忙
裏過青山白水空煙霧 夢覺邯鄲炊甑墮釣月樵雲

生計從天付話到忘言成默坐夕陰一片溪山暮

齊天樂

送劉太守入覲

水風吹透菱灘綠南湖贈人涼意仙舫登龍靈槎泛斗
千里明河秋霽飄飄行旆瞻紫蓋神光絳都佳氣手捧
琅函嵩呼人在五雲際湖山暫教無主報亭空浮碧
峰孤環翠郡南有浮碧亭園中假山有環翠峰后土風雷帝青日月元氣
一時交會明廷眷注久五袴聞謠兩歧書瑞鼇抃彤墀
天顏應笑喜

賀新郎

送陳學諭之袁州教任

行色秋風裏望遙空寒雲一帶鴈行南去短短煙條溪
上柳欲挽仙舟無計又總道夕陽難駐歌到陽關聲漸

咽黯秋光滴作青衿淚離有頃會無據
九年芳潤滋
芹水種門牆兩場桃李十圍丹桂鳴世卻須移木鐸吾
道又看西矣誰便說青霄垂翅金馬他年期待詔計文
園未減凌雲氣重把酒爲伸意

玉蝴蝶

秋懷時在

寥落天涯情景碧雲合處連日秋陰人影西風樓空鴈
字沉沉晚樓臺一聲長笛靜院宇幾處疎砧遣寒侵客
塵破帽如夢孤衾
沉吟青銅看罷年華荏苒世路侵
尋寶劍埋光錦囊三尺少知音青衫濕別愁不斷黃花
老歸思難禁黯登臨碧山遠水一片傷心

齊天樂

壽人

東風吹醒南湖綠臘痕放教春早沁雪梅心破煙柳眼
前拂舊寒多少燒燈未了報庭院新晴樓臺清曉銀燭
光中繡簾開處篆煙裊 畫堂移入蓬島擁羣仙烏履
雲韶縹緲南極壽星西池王母一對後天不老膝前圍
繞有袍錦畫輝墨香秋飽醉倚蟠桃洞天春正好

滿庭芳

雲冷雙頭香零九蕊青春過了難追淒涼故苑紅影日
空移誰信芳魂解返嬌羞態依約前時驚心處物華如
在世事等閒非 思量還可恨年年三月風雨殘枝謾
金瓶鬪品錦障供詩早是偷春有手留情地蜂蝶安知
相看好芳容並美造化果吾私

滿江紅 題太原官舍壁

歸去來兮青山好欲歸便得人世事風前燈焰夢中槐
國驛馬出門塵上路觴齋聽雨江湖客把十年忙冗換
清閒嗟何益 太行嶺孤雲沒江南夢重山隔有何人
五湖煙棹洞庭霜笛寶劔醉看豪氣在銀屏晚怯秋風
入向中宵無意更聞鷄空吶嚦

前腔

歸去來兮懷歸意幾人知得尋思起前年江海去年京
國奔走隙駒春夢路飄零海燕秋風客念家山松竹久
荒蕪疎三益 風流散音塵沒身世在江山隔遣何人
杏花影裏月明吹笛紅雨等閒花事盡青銅容易霜華

入被鴈聲報到塞門秋聽嘹唳

齊天樂

壽呂太守正月二十四日也

湖山千里棠陰路春光又回官柳花市歡聲茅簷煖氣
民俗正歌安阜收燈未久轉萬點紅毬化成南斗瑞暎
階符壽星現在五雲首涵敷盛推山藪儘肉羹翻污
車裊唾嘔霖雨功深星辰地近槐棘竝登三九金章到
手對萬本梅花百壺春酒醉倚東風年年開笑口

滿庭芳

五頭瑞蓮陳司訓官舍所
產謂是歲邑士發解之兆

香擁紅雲影搖青蓋水宮競鬪明粧天然異種誰數並
頭芳月地恍疑人影湘妃醉春散香囊還相亂三三兩
兩交頸紫鴛鴦薰風何處起最宜吟賞春草池塘更

閒情澹雅官舍清涼折桂預期仙步斜陽裏相襯槐黃
行看好舟中蓮女馬上綵衣郎

醉江月

挽拙菴潘先生

一菴藏拙問乾坤借得數莖華髮夜半游仙孤枕夢飛
入玉清雙闕山色冥迷水聲哽咽老鶴愁寒骨梅花如
舊玉簪無奈銷折 遙想竹下吟箋山陰清晝冷淡蘭
亭墨十里屐痕吹未散芳草叢邊雙迹華表秋荒剡舟
夜冷空有當時月巖花急雨春山飛遍榆莢

木蘭花慢

雙輓

算多愁和天也慘雙股淚蓆閒流記花月樓臺扇橫鸞
影杖擁鳩頭西風妬他春好併霜威作踐一場秋翠減

芙蓉夜被塵生古褐冬裘 青山今古事悠悠雙塚向
人愁有守宿寒鴉招魂芳草代哭鳴蜩椿萱世難全壽
嘆人生到此意俱休付與夕陽收管一盃時奠松楸

醉江月

題天籟老人像
天籟金末詞人

滑稽玩世知胸藏多少春花秋月天籟有詞人有像還
是遺山風骨松下巢由竹閒逸少氣韻真高潔坐談撫
掌溪山等是詩訣 見說多景樓前鳳凰臺上醉帽風
吹裂千古英豪消歇盡江水至今悲咽九死投荒三年
坐困一樣成愁絕寄聲知否酒盃當酌松雪

水調歌

題扇

功名大槐夢身世釣魚舟歸來雪川茗水聊當五湖遊

誰計一絲高潔自喜半生清曠瓦枕對眠鷗回首雲臺
事一笑正堪休 桃花岸蘋花渚荻花洲蓑衣任君高
掛安用搭羊裘拍面溪風山雨滿棹江雲海月濁酒注
磁甌醉後不知處江上數峯秋

摸魚兒

春遊

喜朝來柳煙花雨尋春問人何處香車寶馬傾城出坐
擁南州歌吹春好未但只見暖雲芳草飄香氣鷗邊浦
瀲兩兩畫船橫一篙深碧撐向水雲醉 浮生事勘破
蝸牛戰蟻百年希遇良會五侯七貴貂蟬美難免鬢絲
憔悴休辭去最好是柳條綰鐙風牽袂酒闌衆起歸路
月明中嚴城鐘鼓花影滿街碎

清平樂

春日偶書

傷春無緒連日瞢騰醉門外落花紅滿地愁到杜鵑啼
處小窗酣碗香茶日高懶趁朝衙說與簾前雙燕莫
教放進楊花

前腔

燕

綠窗驚睡說盡天涯事簾外春寒禁不住爭得重門深
閉雨昏芳草池塘度花穿柳心忙困倚不知情倦東
風夢斷昭陽

巫山一片雲

飛鳴宿
食鴈

落日邊聲急寒雲客路愁西風吹度岳陽樓木葉正辭
秋
借陣亂驚漁火聲寒墮船舟月明投足荻花洲聊緩

稻梁謀

滿庭芳

春草

山外斜陽客邊細雨天涯一望關情故人何處春草又
還生長記當時南浦同攜手別淚雙零音塵斷江淹已
老身世總堪驚東風眞薄倖移將新綠暗滿歸程莽
燒痕斷處一片愁城煙靄秦川故道牛羊外多少長亭
孤村晚杜鵑聲急馬上酒微醒

酹江月

題陳都憲希冉雙玉合藏卷希冉會稽人厥先祖客死北方僞葬蠡縣後希冉

登朝乞假訪求以歸合葬祖母鄉夫人湘湖之兆

白楊風雨算天涯過了幾番寒食誰信客牀胡蝶夢竟
做游魂羈魄杜宇難歸薤歌誰舉雲渺稽山窟攢封無

主土花凝滿蒼碧。早是天道非虧仁人有後蘭玉孫
枝出袍笏不施鰲石拜來訪蒼梧荆棘劍合龍津鶴歸
華表重瘞蘭亭墨空山皎月物華光射雙壁

滿庭芳

蘭

窈谷陰崖香雲煖雨芳蕤初着幽叢翛然世外此意幾
人同回望三湘何許靈均去佩冷江空無人問斷魂千
里相逐落梅風平生良自愛孤標高韻寂寞山中算
知心獨許三尺焦桐腸斷王孫未返年時草又襯殘紅
春愁滿汀蘋岸芷落日楚江東

前腔

春草兼
草蟲畫

濃綠和煙淺青漱雨春回芳草池塘繡簾未捲紅影罩

西廊九十光陰苦短蜻蜒老蜂蝶爭忙相將近鳴蛙鼓
吹閒悶滿斜陽 浮生真可笑區區世路病懶相妨謾
志勤絡緯技轉螭螂誰道安身有處苔茵展風月壇場
三盃好江花江草分付與詩腸

酹江月

梅

暗香淺水被西山扶上一痕冰月瘦鶴伶仃人未寢坐
待茶煙清發十五年閒四千里外曾作羅浮客參橫斗
轉不堪酒散人別 天意放我清閒夜寒鶴筆重踏西
湖雪醉眼朦朧花慘慘道是相逢愁絕林樾閒人水涯
幽士千古還高潔和羹休論笛聲且爲吹徹

滿庭芳

桂花

露冷銅盤風清玉宇一年明月佳時可人丹桂金粟滿
橫枝長記廣寒徐步瑤階靜碧影參差誇張處天香在
手濃透綠羅衣孤芳容易歇十年一夢回首俱非早
故山招隱林屋巖扉比似芙蓉一樣秋風裏幽恨依依
還相慰仙葩月種元不在人知

醉江月

梅

疎枝冷幹向水邊籬落背人幽獨憑仗東君能慰藉特
遣陽和先屬比雪裁花臨池顧影百卉皆羞縮一清相
映白駒人在空谷曾記臘雪晴時瘦藤敝篋行繞孤
山麓月到橫梢鐘已靜時有禽翻霜竹飲散羅浮信遲
驛使幽夢應難續小軒孤倚七絃彈遍冰玉

蝶戀花

一寸柔腸千里思倦倚屏山夢到天涯去簾外日高花
影砌鶯聲歇在垂楊裏半鞦韆香雲驚枕墜起看雕梁
燕子歸來未行過秋千雙眼淚亂紅委地春無王

水南集卷十上

子龍未未日思海千變難知誠難交故存無王

沙洲望登塔五垂樹裏半醉香邊煮肉望法評

一十年間千里思難得挑出夢隨天去盡中

水南集卷十下

明德清陳
霆聲伯著

詞

憶章臺

感舊

連環手分違久離恨濃如酒畫闌十二鎖朱樓凭高不見章臺柳
從歸後知安否錦字何曾有春雲閣雨暗陽臺不堪夢裏空回首

蝶戀花

舟中客懷

春草綠波南浦路畫舸亭亭載取離愁去無限江山牽別思短帆夕照孤篷雨
羅帕新詞封遠淚欲寄江南未遇梅花使賴有夢魂知此意飛歸夜夜三更裏

蝶戀花

春閨

門掩東風楊柳院
淺綠窗紗深映宮粧面
隱約吳峯屏裏見
夢魂去繞江南遠
梁上飛來雙海燕
萬語千言惹起情無限
點點落紅心事亂
捲簾無語傷春晚

滿江紅

鎮江驛中

樓上春寒倚危欄
杏花消瘦重門外
簷鈴四響落梅風
驟茶夢做殘
銀燭影旅魂消盡
銅壺漏早
紗窗處處月痕斜
三更後
眠未穩
吟難就
紅爐冷
青綾縐
想雕房曲檻
少年時候錦瑟坐
調絃索手羅衣醉擁薰香袖
到如今
惟只是相思濃如舊

瑞龍吟

春情和宋周美成韻

天涯路多少障夢雲山礙
眸煙樹藤蕪綠暗春江斷腸
流水雙魚何處悄凝伫
曾記年時巷陌繡簾朱戶稱
時整整新粧媽妍花貌清
冷鶯語縹緲鳳簫吹斷絲
雲千里夜深院落惟有明月
窺窗照人如故紅菱小疊
謾寫相思句無因見風前
月底盈盈仙步春與啼鴉
去夕陽照出傷離緒絲柳
愁千縷芳思亂續紛落紅
如雨晚風無主一庭飛絮

浣溪紗

春睡

草綠閒堦日自移
畫梁泥冷燕歸遲
懨懨春困解羅衣
枕面正隨蝴蝶化
柳陰誰遣杜鵑啼
起來花影到簾

幃

沁園春 冷山外號

正壑閒情松菊舊游未許相關笑尋梅蠟屐雲埋一兩
藏書茅屋苔老三間蕙帳夜空碧峯朝暝爭奈愁他鶴
與猿無人管有洞門寂寂流水潺潺 鳴騶催赴朝班
儘京國緇塵上鬢髮任碎葉驚風一番秋早落花滿地
幾度春闌蟻穴無憑山靈有待回首林間倦羽還君知
否算神仙總在未老身閒

清平樂 遊用宋王介甫韻

香車隘住笑揭紅簾語淺蹴芳塵羅襪污堤上未乾花
雨水畫船載得琵琶醉中情思無涯不管湖煙湖水東
風取意飛花

薄命女 長信秋詞

更漏咽嚴禁沉沉金鎖合別殿笙歌歇
薰餘繡被香
燼睡覺銀屏涼怯翠輦不來蓮炬滅月到梧桐缺

菩薩蠻 閨情

一簾幽夢隨飛絮庭前數點梨花雨推枕又斜陽博山
餘篆香
紅霞凝困臉鸞匣菱花掩芳草近黃昏無言
深閉門

蘇幕遮 風情

玉驄驕金勒富策柳鞭花醉向章臺卧寶枕鴛屏留客
住燕子歸時簾捲青樓暮
柳枝吟桃葉渡別語叮嚀
回首成虛誤魚鴈又將芳信阻惆悵深情夢斷年時路

翠湘風 夏夜

輕雷送雨過池塘，煩蒸頓解柳外水亭涼。
手弄冰綃新浴起，半墮釵鳳風裏芰荷香。
滿凭欄十里湖光，流蘇垂下絳厨張。
水晶枕底紋簟展，清湘攜手月中人。
似玉懶上牙牀起，向閒堦伫立紫薇影轉迴廊。

眼兒媚 暮春

點點飛花付東流，新綠染芳洲。
數聲杜宇，一簾風絮，春去難留。
垂楊故作傷離態，風裏舞輕柔。
年華負也，夢迷湘水，恨鎖秦樓。

薄倖 春怨

海棠零亂點蒼苔，錦繡鋪遍破曉夢。
子規啼血蝴蝶一

牀驚散恨小樓昨夜東風無情捲入閒庭院便柳絮縈
空梨花翻雪斷送春光一半自到得清明後羅袖上
淚痕不斷傷心向流水遡紅迎綠往來覓取相思片擬
今回見嘆青鸞無準依然誤卻桃花面畫長簾捲羞覩
歸來雙燕

畫堂春

秋眺

烟凝寒碧楚山秋夕陽斂盡山頭長江無語向東流目
斷歸舟紅葉題殘舊恨翠眉蹙破新愁月明鴈字影
悠悠人倚西樓

又 秋夜

井梧翻葉響秋聲玉堦風露淒清陰蟲無數草閒鳴泣

盡殘更 紅淚暗流寶蠟碧峰冷浸銀屏夢回簾外月
華明無限傷情

應天長

晚眺

樓臺落日漸古樹昏煙亂鴉飛集渡口歸帆勢與寒潮
齊急雲山窮眼力曠千里楚天凝碧相上下孤鶩落霞
點成秋色 俯仰感今昔嗟舊日繁華而今蕭瑟剩水
殘山惟有夢魂相憶飛鴻無信息知誰念沈腰消瘠關
情處風裏何人一聲長笛

菩薩蠻

冬景

彤雲黯淡冰花撒凍梅枝上纏寒雀簾幙密遮風銅爐
獸炭紅 淺斟延小唱醉倒銷金帳煮雪理茶甌清香

滿碗浮

鷓鴣天

感春

九十春光逐逝流，煙花零落冷如秋。
雲鏤寶月殘歌扇，塵絡紋窗暗酒樓。
蝴蝶懶，杜鵑愁，天涯新綠滿汀洲。
惱人怕見楊花面，又被紛紛亂撲頭。

行香子

梅未着花

標格天然占斷風煙，想南枝猶怯餘寒。
香苞未點疎影，依前稱月明時。
霜冷夜雪晴天，西湖屐冷東垣賦老。
問春心何苦擔延，一枝得暖隨分。
清妍任玉堂中茅屋，下野橋邊。

醉花陰

梅花風謝

玉堂不閉東風驟一夜瓊枝瘦香雪亂侵衣夢醒江樓
羌笛誰家奏 仙姿自別羅浮後消損應非舊莫去倚
闌干冷月清霜正是愁時候

滿庭芳

春宵會飲

錦障芙蓉繡簾翡翠畫堂圍護春風寶釵金釧高會盡
仙容況遇良辰美景香羅解樂事無窮歌謳處春紅照
眼人在萬花中 堪嗟塵世客天涯飛絮海角飄蓬又
何須計較得喪窮通俯仰今來古往尋思起春夢一場
空爭如且開懷暢飲沉醉倚芳叢

摸魚兒

春恨

竟因循清明過了依然春恨如舊落花狼藉重門閉長

是懨懨中酒從拆手最苦是斷腸院落黃昏後風狂雨
驟更燕子無聊杜鵑有怨添上箇消瘦 尋春約惆悵
參差難就韓香猶在襟袖綠陰啼鴉章臺路疎了傍花
隨柳還念否嗟兩地雲輕雨薄空回首音書未有莫去
問鱗鴻山長水遠知在甚時候

如夢令

春暮

夢裏忽驚春去簾外日高慵起中酒病懨懨辜負踏青
心緒憔悴憔悴花褪一庭紅雨

如夢令

秋懷

風入井桐聲碎驚起客窗秋思天濶鴈來遲望斷錦機
紅字歸去歸去人在畫樓獨倚

賀新郎 記夢

獸鼎銷沉縷掩屏山簾幃低下晝長門閉移盡花陰無人喚春睡沉沉未起漸夢入花叢徑裏滿眼春嬌驚舊約轉雕闌曲檻深深處相見也笑偎倚貪歡一餉留情住楚臺高雨雲散後峯巒開霽素手纖纖尋碁局共鬪綠窗紅子又攜向西廂私語別久愁多珠淚重正耳邊聊訴相思意驚散也洒窗雨

鷓鴣天 春飲

新酒鵝黃漾碧樽眼波相屬意殷勤梨花夜月陪歌扇楊柳春風蕩舞裙窮樂事慶芳辰人生難得是相親仗誰塞卻春歸路長使花前醉臉新

浪淘沙

牧子臥牛背晚歸

牛背穩於舟身外無憂醉來一枕夢巢由驚起不知何
處笛斜日林邱古樹晚鴉投暝入西樓寒烟暮靄織
成秋歸路一鞭衰草色野水橋頭

蝶戀花

招友

堤柳青絲搓欲就初試羅衣簾幕寒仍透紫陌塵香車
馬驟太平簫鼓村村有店舍無烟寒食候小院閒庭
門掩梨花晝來日陰晴渾未究及時且罄花前酒

臨江仙

秋江歸隱圖

菰米炊香鱸入饌吳淞景屬三秋長江湖上水雲浮好
風如箭天際送歸舟回首功名成一夢歸來松菊應

羞何人相候坐沙頭平林暝處鴉背夕陽收

滿庭芳

寫懷

羅帕分香玉釵留股東風羞記初盟殘楊剩柳休問
春鶯虛向蒲關駐馬淹誤了雲路鵬程傷心處枕寒衾
冷香夢杳難成章臺人遠尋春計晚露蕊凋零嘆落
花有意流水無情好事從來易阻御溝裏紅葉難憑空
惆悵夜深人靜辜負月華明

燭影搖紅

斑竹簾

巧碧玲瓏絨痕着處湘筠軟多情應苦禁楊花春淚斑
斑滿不道妨他梁燕護東風曉粧庭院嬌柔睡起鬢影
參差眼花撩亂 晝永無人玉纖輕運龜紋捲斷腸心

事上懸旌新月銀鈞淺多少幽期難便俏眉峯有誰能
見一絲篆縷數疊花陰畫堂深遠

醉江月

雲巢 雲譬道巢譬
天地道學者號也

乾坤空洞是何年營構儘堪棲息萬點飛雲憑頓放大
道本來充塞霽月光風青山綠樹妙意超形色網緼變
化箇中示我安宅 長笑林下山閒無心世故一枕眠
蒼石造化斡旋身上事天地本吾居室無去無來非空
非相泰字元虛寂與君勘破鳶魚總是粗跡

水龍吟

楊花和章質夫韵

是誰斷送春光又柳絮滿空飛墜長途飄泊征衣□□
攪人離思夢熟羅厨臉消花靨鏡鸞塵閉傍粧臺點點

隨風散亂幾番欲下還起
灞水舊時行處遍長條雪
花如綴紅芳竟老綠陰成
疊寸心愁碎曉雨初晴半
歸泥土半隨流水捲珠簾
盡日留春不住灑東風淚

鷓鴣天

會飲有贈

瀲灩流霞玳瑁鍾醅顏微映
燭花紅兩行飛鴈瑤箏月
十里芳香錦障風
情有限思何窮天涯離別苦
忽忽夢魂不怕鴛鴦妬
潛作行雲到月中

滿江紅

夜雨

夜永香殘踈簷外瀟瀟
寒雨正衣篝微潤羅衾無
侶燈焰昏沉孤館內梨花
寂寞重門裏被斜風吹折
一天秋敲窗紙
聲點滴銅壺水絲散亂垂
楊縷儘敲眠無寐

屏山遍倚旅況暗驚南浦別故人謾想西窗語況計程
芳草暗天涯春歸矣

洞仙歌

莊子觀泉

飛流直下瀉長空如練濺沫寒崖玉珠亂轉山腰萬點
蒼雪侵林林影外一帶白虹初斷道人踈懶久散髮
披襟石磴苔茵坐來慣適意總忘言斜日雙瞳寒光耀
目花生眩待橫空一劍上青冥看飛渡銀河靈源清淺

風入松

秋怨

寶釵半脫鬢雲鬆瘦影怯西風屏山似近陽臺路片時
裏幽夢相通眉黛顰殘宮綠淚痕搵透香紅小窗錦
字背人封密意寄重重歸期未準驚秋老黃花淡離恨

偏濃日暮斷雲鴻鴈夜寒踈雨梧桐

又 情人怨

玉京會記擅風流絲竹按梁州秋波嬌滴春山淡金蓮
小肢體輕柔粧就烏雲滿鏡舞餘紅錦纏頭繁華一
去竟難留門巷不堪秋雕鞍遊冶歸何處相思夢空繞
秦樓腸斷塞鴻北去傷心江水東流

蘇武慢

下第時作以下共四首俱用虞邵庵韻

竿裊長虹鈎彎新月幾向禹門垂釣掣碎鰲頭踏翻桃
浪壯志已乖年少龍虎飛騰風雷際運夢想玉堂書詔
挺烏紗豪氣填胸長劍欲摩天表回首處數畝蒼煙
半窗紅日依舊野花啼鳥登山臨水弄月吟風舒嘯響

驚雲杪雪案經書螢窗燈火歷覽古今俱了看明年雷
動皇都馳馬杏園春曉

又天台

澗水流瓢桃花夾岸路入神仙寰宇芍藥比容芙蓉如
面縹緲霞綃雲縷障風嫋嫋隔水盈盈蘭麝欲薰芳語
俏多情天遣相逢總是飛瓊儔侶方信有物外乾坤
壺中日月身在蓬萊洞府百鳥啼春紫簫吹月留我花
閒居住業火未消塵緣相誤一別頓成今古待重來煙
水茫茫惆悵亂紅如雨

又秋懷

手捲珠簾眼窮雲樹樓外遠山凝碧籬菊黃時水楓丹

後人在天南北一日三秋寸心千里難借凌空雙鳥背
斜陽流水寒鴉往事黯然今昔 當此際羅帶分香紅
綃封淚夢繞玉窗瑤室離恨悠悠愁懷耿耿謾有拍樽
雲液鴈足難憑馬蹄無準誰與遠傳消息對西風愁損
菱花潘鬢嗟非前日

漁家傲

漁舟

雨笠烟蓑披帶慣暮歸曉出時相伴村酒醉來無客喚
舟不纜任風吹着蘆花岸 春水鱖魚長尺半秋風菰
米渾家飯爲問雲臺興甚漢閒中看海雲江月無邊畔

風入松

旅遊圖

青山斷送古今愁落日下林丘西風古道無人影行囊

薄塵滿征裘暝色鴈投何處笛聲人在高樓
長途世事兩悠悠羈客倦遨遊秋容詩意知何在寒鴉外流水
橋頭憑仗丹青會寫爲予添箇離憂

蝶戀花

春意

借問春光今幾許楊柳梢頭一線輕黃縷殘月薄紗人
乍起胭脂冷淡梅粧洗試縮香雲寒墮指不道東風
作惡還如此粧罷開簾呼盃水籠中鸚鵡傳言語

蝶戀花

秋

明月滿樓霜滿瓦雲冷鴛衾夢裏聞簷馬千里征衣誰
寄也相思滿紙從頭寫門外平蕪迷曠野落日青山
幾見南歸者一一賓鴻飛上下春山兩點和愁口

清平樂 夏

餘花落盡蜂蝶還成陣綠滿汀洲芳杜嫩乳鴨一雙嬌
困 葛衣縷縷風微白團扇上新詞欲試碧筒煮酒琵琶
催換春兒

一翦梅 扇梅

斜綰香雲倚鏡臺春已輸梅人欲欺梅護寒簾幙手初
開翠羽飛來白雪飄來 冷月寒雲到玉堦畫角聲哀
玉笛腔哀春旛笑語遍城隈傳道陽回喜是郎回

中秋月 和人韻

碧海澄秋遙空霽雨姮娥起駕飛輪素光萬頃灝氣滿
乾坤坐久踈星漸失枯枝冷驚鷓南村閒堦下桂眠秋

影香味瀉金罇 瑤臺當此夜露零玉珮風振仙裙記
唾壺殘缺歌韻清溫回首西風易老流年事屈指休論
空驚嘆故人千里相望渺江雲

蝶戀花

春思

芳意柔情千萬縷付與楊花飄泊江南去斗帳日高猶
熟睡枕痕蹙損眉峯翠 人事多違花事退淚眼殘花
日日傷憔悴試捲珠簾通燕語綉鞋行到無人處

水調歌頭

題杏園春色卷

恩袍草色動仙籍桂香浮三層暖浪禹門一躍過鰲頭
金殿綵雲錦覆玉陛歡聲雷動臚唱出龍樓仙侶三千
輩平步上瀛州 馬如龍車似水恣遨遊曲江春酒杏

花十里錦雲稠看取春風得意漸入揚州佳境纖手上
簾鈞總是書生事回首十年秋

滿庭芳

書賞花卷

燕子簾幃秋千院宇被花賣到春光小屏銀燭入夜照
紅芳可是東君有意繁華地賃與詩狂三盃後晚香初
罷簷雨正淋浪浮生能幾許坐閒屈指三十風霜嘆
彩雲易散春夢虛忙惟有詩情酒興箇中事猶惱愁腸
花應恨滿睂春淚搵透紫香囊

水調歌頭

送褚正郎還朝

青山薦行色碧浪湧蘋洲紅旗棹影送君騎鶴上揚州
相餞一盃清水比似一輪明月三載照高秋回首棠陰

路父老淚雙流 黯茗南雲杳杳水悠悠柳絲殘脆相
看無計挽仙舟一道星河屈斗萬里長風破浪身抵鳳
池頭從此鸞臺峻鷓鴣阻同遊

清平樂

春朝
雨中

厭厭夜雨小院重門閉無奈春寒推不去向曉尙侵羅
被 起來點檢韶華東風幸未梨花獨惜臙脂委地閒
庭落遍山茶

醉江月

癸未春二月中旬
之末雪盈數寸

春雲靄靄被東風剪做瓊裾瑤珞玉女羣游飛素蓋光
動青皇宮闕寒食梨花清明柳絮飄向中和節杏樓人
醉冰容相映紅頰 還想西子湖邊踏青埋路冷透羅

鞋結誰在畫船閒
弄水好似剡溪舟
楫蝶粉都迷鶯黃
難至燕子噤無說
晴光何在夜庭誤
認花月

賀新郎

端午

梅子成金彈
正池塘廉纖雨歇
海榴紅綻
節序催人又
重午綵索新纏
雙腕更艾虎朱符
粧遍謾對蒲樽開角
黍奈沉湘舊事
經傷感須一醉強驅遣
清江競渡人
爭看繞沙堤荷香
荏苒南薰微扇
兩兩龍舟鬪相向
奪罷錦標方散
又早被西山催晚
十里平波人去後
但一鈎新月蛾眉淺
歸棹急浪花亂

風入松

江樓
秋眺

水雲微淡浸江樓
山勢湧滄洲
黃花欲綻丹楓老
吳霜

冷鴈叫清秋雲外離情耿耿天涯歸信悠悠 亂鴉投
樹夕陽收江水向東流登樓望斷平蕪影凭闌久多少
閒愁風裏一聲漁笛浪中數點行舟

燭影搖紅

送章子仁
歸吳中

澤國秋霜鴈行南去瀟湘晚西風歸興動江湖一尺鱸
魚短好是別懷難遣濺斜陽青衫淚點坐間無奈錦瑟
哀絃玉壺深蓋 三徑無成天涯身世嗟蓬轉新聲聊
遣唱陽關紅燭搖金剪還有登高望眼渺平蕪山遙水
遠一聲長笛數點歸鴉倚樓心懶

浣溪紗

初夏

新笋成竿粉節光落花紅潤燕泥香水亭簾幕小池塘

萍約翠痕樓影出柳搏清蔭簟紋涼拋書一枕夢能
長

水調歌頭

送黃司
訓之京

斷雲催落日寒鴈沂西風一樽別酒青山去意晚來濃
人道九年教化好似一天時雨未論桔槔功芹水香名
在傳誦滿兒童 東圖書裝琴劍買孤篷今宵明月相
看千里與君同休管青瓊舊物須有鐵冠新命霜氣凜
秋空醉筆點行色江樹向人紅

臨江仙

漁舟

瓦枕半敲詩夢醒起來人靜江空叢蘆蕭瑟戰金風釣
舟不繫吹落碧灘中 坐穩總忘身外事蒼山獨對踈

慵夜深清露滴芙蓉滿篷涼月人在水晶宮

千秋歲

夏日池亭

柳陰亭館影落池塘淺清晝永琴書懶絳幘炎氣少碧
簾波紋展人困也北窗一夢邯鄲遠推枕西林晚浴
起冰綃軟新月上珠簾捲霜紈搖素手雪藕調冰碗歌
韻響晝船歸處荷香滿

酌江月

宣德初汴人有趙參政者宦歷湖省乃父來就養死葬西湖之上其子孫繪爲

松楸圖介子所善者乞賦

攜壺荷鋤算青山是處可教埋骨天地大都成逆旅黃
土何分南北遼鶴秋沉蜀鷓春斷回首淮山隔紫薇何
在月明空伴詩魄見說狐兔叢邊樹存吳劍匣保蘭

亭墨麥飯不辭千里遠來灑他鄉寒食十里湖煙兩峯
殘照記取丹青筆不禁清淚空巖春雨時滴

漁家傲

江村漁
樂圖

萬里清江春水碧楊花亂點撩行客日午釣篷驚雪白
無人拭酒醒瓦枕雙敲側一笑浮名眞外物五湖誰
論雲寬窄香餌綸竿都棄擲盤雙膝江山晚翠輸長笛

西江月

夏日
西堂

紈扇欲拋還舉水沉將盡重添南薰微透水晶簾紋浪
忽搖冰簟楊柳鳴蜩綠暗荷花落日紅酣晚涼浴起
卸輕衫新月一鉤纖淡

卜算子

冬夜不寐

畫角斷譙樓珠斗橫仙闕梢樞無煙午夜長茗碗分香
雪漏結翠壺冰被展青綾鐵畢竟教人懶去眠立盡
梅花月

木蘭花慢

續舟

把江湖清興都分付與烏犍向芳草陂塘駕風移霧擬
泛平川肩頭吟篷書幔引踈狂放浪野雲前古道撐低
落照寒林載出長煙西湖畫舫剡溪船爭似此安然
看月上桃林歌聲吹乃角柁鞭舷醉來滄洲入夢枕蓑
衣背上且高眠一任松濤捲地不妨麥浪翻天

燭影搖紅

壽沈母八十八
閏八月望後也

滿百光陰瓊樓再賞銀蟾皎脫辰剛遇閏中秋天意分

明巧桂子香風未了併祥煙一時清裊星輝南極桃熟
西池綺筵開早人月雙圓月娥素貌年年好西風鴈
外鶴南飛瀛海雲霞繞報道金蓮屢到擁飛瓊醉酣蓬
島萊衣對舞秦管聯吹洞天未曉

蝶戀花

葡萄

涼入秋風驚枕簟一架藤蘿攪碎閒庭院虬尾絲絲簾
影亂眞珠拂地無人捲疑是嫦娥遺寶串偷掛西窗
月下分明見濃酒未教醒夜半醉鄉不換涼州遠

如夢令

夏日

池上繁陰深蓋高柳古槐交碍晚雨過西樓洗出月華
相待涼快涼快直面芰荷風灑

念奴嬌

咏燕和人韵

賣花時節正輕風
園榭弄晴池
館緒語匆匆言不盡
穿得翠迷紅
亂華屋門高
主人恩重舊壘還堪戀
昭陽何處望中清夢初斷
長是淚灑東風
天涯無主誰與尋
方便冷落孤身飄瀚海
倦翼不堪頻展絳縷
年深雲軒事渺老去
知人厭多情
簾影日高爲我偷捲

蘭陵王

荷花

野塘碧雲錦天機
乍織垂楊外
紅日半酣翠蓋亭亭擁
傾國晚來溪雨息
亂瀉明珠蒼壁
風簾捲畫閣盡開一味清香送涼入
攜樽近花側
問嬌艷何如六郎顏色
芳洲別浦羞孤特
正一鉤新月畫船十里浣紗人去歌

韵寂望中水雲隔
回首又秋暹
漸香老紅衣飛趁潮
汐寒煙敗葦添愁
戚似相對共嘆離懷
無極殘陽影裏
有宿鷺黯凝立

念奴嬌

和宋人中
秋月韵

冰輪碾上望山河
影裏桂枝橫
綠零露侵人秋氣重
漸覺玉樓生粟
萬里無雲碧天如水
冷浸黃金屋
水晶高捲簾波微映湘竹
須信此景無多
樽前拚醉注流霞
如瀑我愛清光
光照我洗蕩塵埃
千斛良夜何如酒酣
興起豪氣凌雲
鶴浩歌催版唾壺擊碎圓玉

淡天垂幕見銀盤
轉處餘煙收綠
百尺飛樓間倚久
仙桂時飄香粟
皓鶴無聲金梧有影
寒氣生華屋
好風細

細遞來何處絲竹
看取千里嬋娟銀屏交映光射廬
峯瀑今夜嫦娥應過我捲起眞珠千斛長劍橫空翩然
飛迓底用乘鸞鶴滿身清露鳳笙吹破攢玉

玉樓春

客懷

斜陽芳草迷歸路
撚指光陰愁裏過梨花曉夢五更寒
杜宇春心三月暮
天涯望望嗟離阻那更碧山無盡
數深情只好附雙魚
腸斷春潮渺江渡

醉江月

夜雪

冰花夜慘悄
氣侵窗紙寒燈明滅平地瓊瑤鋪欲遍
做我庭前明月柳絮縈春梨雲攪夢滾滾無休歇
酸風助陣繞簷吹響枯葉
堪笑錦帳羊羔粗豪風味全與文

人別細碾鳳團鎔淨片一洗詩脾清澈紙帳梅慳地爐
火近未放衾如鐵閉門高臥任他天地凝合

風入松

海天一覽

乾坤空斷海天秋遠水際天浮望中一髮青山小雲濤
湧萬里歸舟明月雙鳧渺渺西風兩鬢颼颼布袍長
劍走神州三醉岳陽樓水晶宮裏騎鯨去星河動仙派
迴流鐵笛叫開閭闔珮環飛下瀛洲

賀新郎

賀得子

天亦從人意遣黃熊幾宵飛兆夢中新記隔帳笙鏞啼
未了英物不消多試更頭玉硤硤奇異經月異香吹不
散氣充閭鬱鬱葱蔥地須信道十分喜掌珠一顆纔

周歲滿華堂賓朋驚看食牛豪氣兩鬢莫憂秋漸早萬
事於人足矣便整備傳家之計爲報鳳池煩接引看飛
沖五色丹山羽真箇是應時器

長相思

風雨歸
漁圖

飄雨花躍浪花渺渺春江收釣車東風蓑笠斜 繫蘆
芽近蒲芽一葉輕舟寄淺沙穿魚向酒家

蝶戀花

春暮
有作

燕子歸遲春去早送盡東風可惜楊花老人道春來情
緒好爭知春去添愁惱 花節鶯期都過了梅子初肥
卻是櫻桃小一片綠陰樓外繞關山在望征人杳

踏莎行

菊花
便面

青山冷

臨江仙

落盡櫻桃春事減
小園蜂蝶依依子規啼罷月沉西曲
屏向曉殘燭淚空垂
樓外綠蕪千里道長亭過騎頻
嘶一春無信慰相思
重門寂寞風雨過花時

木蘭花慢

題雙鳳呈祥卷
賀馮太守得子

喜仙山誕菓百年事未爲遲
正華館春融紅裁錦襪翠
揭犀幃天公要成雙美
五年閒兩送玉麟兒表表食牛
豪氣亭亭玉樹風姿
丹山長養羽毛奇梧竹豈終棲
看鳴盛朝陽覽輝阿閣浴采
天池聲名直追三鳳笑燕
山落後月中枝爲報青霄鷓鷯九成
佗讓來儀

蝶戀花 斑竹

春雨冥迷雲委地，節節琅玕，滴滴英皇淚。人倚孤舟愁不寐，鷓鴣啼破湘江翠。千里蒼梧開晚霽，碧水悠悠，不盡臨江意。月在粉牆搖鳳尾，紫臺環佩知何處。

長相思

竹

金鐵鳴玉雪鳴簷，外秋高風日清。蒼陰落枕屏，湘山橫。湘水平，兩岸暝煙孤棹停。簫聲吹月明。

醉江月

吳二尹西湖圖
以下凡十景

紅塵道路笑西湖，雖好未曾相識。匹馬經行天借便，一散松廳羈跡。解帽簪花，攜壺貰酒，相約尋芳客。滿篙春水，畫船盪破晴碧。好是山色空濛，水光瀲灩，花柳酣

風日一片笙歌雲錦地依約樓臺高出峯北峯南湖煙
湖水分付花翁筆錦江何處歸裝聊載春色

行香子

雷峯
夕照

歛盡湖煙淡盡湖天望西冷晚盡湖山林臯燒遠鴉背
金寒看半稜陰兩竿影落湖間殘霞遙映浮嵐半掩
透斜紅一縷峯前何人無事倚杖閒觀正水雲中蓮唱
寂釣舟還

浣溪紗

南屏
晚鐘

湖上羣山紫翠重歸鴉鷺過夕陽春南屏煙外一聲鐘
暝色盡隨花擔返春遊忽逐水雲空明朝車馬又匆

匆

踏莎行

蘇堤
春曉

花露溥紅柳煙迷翠亂山葱蒨非人世早鶯啼送六橋
春綺窗殘月人初起城鑰纔開曙光漸退湖船尙在
停篙處東風滿道濕芳泥夜來堤上催花雨

巫山一段雲

平湖
秋月

鴉鳥層林晚菰蒲片雨晴長煙收盡水雲平湖月十分
明橫笛臨風曲疎鐘隔水聲兩三漁火近蕪汀時有
鴈鵝驚

摸魚兒

花港
觀魚

甚朝來斜風細雨觀魚正有佳趣綠蓑青笠尋常掛誰
道水鄉難寄堪畫處最好是荻花亂點舟三四鷗飛鷺

起更落網驚腥鳴榔畏響潭有老蛟睡
紅塵路比與煙波名利尋思總是難事華亭唳鶴東門大何似得魚
情味君試覩繞平湖水雲十里皆生計紅鱗買醉世事
不相關柳陰敲枕湖上晚峯翠

小重山

柳浪聞鶯

一抹晴煙淡又濃曙鴉飛散盡樹頭紅林鶯催請曉匆
匆啼聲好喚動少年叢
紉扇落花風蘇堤三月景水
溶溶清音度水間歌鐘尋不見春在綠楊中

西江月

麴院荷風

獵獵青蒲弄水陰陰綠樹生涼南薰吹到藕花莊柳下
正多遊舫
驟雨打穿翠蓋浮萍放出紅粧畫闌十二

凭湖光時有暗香來往

卜算子

斷橋梅雪

淺水野橋西
飢鳥依林樾
不見逋翁蹋
屐過僧舍
茶煙歇
鶴跡繞寒汀
梅影敲殘雪
卻被漁舟占
盡清晚釣湖心月

長相思

兩峯插雲

南高峯北高峯
南北峯高插太空
春雲起夜龍
煙濛濛
雨濛濛
三月湖南春樹濃
樓臺煙雨中

菩薩蠻

三潭印月

採菱歌斷遙天晚
碧湖無浪蘋風軟
一月漾三輪
秋光被水分
勝遊超秉燭
畫舸潭心宿
月恰近雙舷
夢魂

中夜寒

巫山一段雲

夏日竹堂

午簟湘陰展晴窗翠葆橫睡餘呼水理茶瓶詩境太清
生古鼎銷香縷疎簾隔履聲虛簷留客對棊枰時聽
子丁丁

燭影搖紅

送二字之任毘陵

春霧空濛東風千里湖山曉紅旗畫鼓簇花堤供帳城
南早請看樽前父老向棠陰淚流多少仙舟難挽湖水
空搖柳絲虛裊經濟才華東南列郡都來口馬蹄帶
取弁山春散向延陵草人意新來正好報前途天門開
了並看劍履快上星辰五雲圍繞

醉江月 竹心巷

栽雲種玉梢山楹移入翠微深處老去閑情無可與只
有此君堪對空洞無腸虛明有竅節節含清氣竹心如
此我心元與相契 見說墨妙亭邊愛山臺下剩有煙
雲地露葉風梢渾未論認取歲寒心事朝爽橫琴秋陰
領鶴付與閒滋味日高響扣玉聲酬我佳句

行香子

墨芙蓉

不向東風不慕春紅澹無言意懶粧慵生香難畫真色
誰同看淺深愁濃淡淚墨痕中 綵雲又散錦城又遠
爲何人消損芳容年華冉冉昨夢匆匆望夕陽邊蓮棹
去水雲空

清平樂

阮柄
素扇

春冰乍裂淺沁生蛟血截玉裁肪分骨節軟襯涼雲彎
月玉葱夜浸銀盆十枝紅甲纖勻不道啼粧難掩淚
沿湘竹斑痕

二郎神

燕

東風簾影依然是去年庭院門外正春寒試憑舊主暫
寄脩梁塵滿借問楊花是何處有華屋朱門堪薦悵綠
岸曉迷紅樓暮暝瀟湘雲暗遙念天涯冷落瑣窗無
伴軟語苦匆匆夢驚清午一枕江南思遠恨別雲軒相
思絳縷知惹幾多恩怨望樓香路杳斷腸無余落花春

晚

清平樂 牧馬圖

千金駿骨仗下思奇特露鬣風髯勞畫筆一顧還傾冀
北少年馳步長安驕嘶柳外花邊今日沙場閒放夕
陽秋草連天

行香子 水芙蓉

露後霜前綠密紅嬌淺深開取意爭妍含嬌似語顧影
還憐點蓼花秋蘋花景菊花天錦城事去海山夢斷
向西風有恨誰傳芳洲就暝蓮唱回船但渚煙生江月
上水雲連

鷓鴣天 素扇

一束清水入手溫華山飛落曉臺雲金星散盡難成點

柳絮承來不見痕
鬢影亂汗珠勻
清風扣動羽車輪
游仙睡熟無人喚
壓損羊家白練裙

長相思

閩情

苔滿庭草滿庭
雨打梨花戶半扃
相思魂夢驚
計歸程
望歸程綠遍汀洲
杜若生天涯
杜宇聲

燭影搖紅

賀馮南淮

蘭玉庭堦秋風吹綠
宜男草高堂拂曉
繡簾開慶事知
多少雲外飛來青鳥
報西池瑤仙降早
金爐噴篆寶蠟
騰輝祥煙縹緲
醉倚蟠桃洞天春色
人難老屏間笑
語簇釵金膝下宮袍
繞更道鶯遷近了
看還朝風光又
好版輿先路寶馬鳴珂
帝城春曉

水南集卷十下

海州學堂
PDC

水南集卷十一

明德清陳 霆聲伯著

序

贈張尹膺獎序

嘉靖丙戌中丞公以重臣撫視于湖省風辨賢舉刺如法已乃下教曰聞之政典有才不奮謂曰情見賢弗彰謂曰蔽維蔽與情雖堯舜在御提耳詔面且不可爲治矧予代天子行郡國將以勵官方課吏績而激揚不先賢否淆亂其何以復于宸辰湖屬城七長吏之材且賢有若某邑張令維最其命所司往爲禮俾終勸焉八月之吉侯晨起盛服卽設廳受事儉贊在前牢幣登列廣

筵聿張匏鼓諧奏丞簿而下胥舉酒屬侯拜且言曰嗚呼休哉斯舉榮矣然匪侯則榮維邑人之休繼自今有終罔怠維御事之惠是承用以爲茲邑賀繼而大夫士致頌父老歸德侯爲之連醕歡聲悅容傾動堂序於是相率謂某曰盍有述乎某惟中司之察廉與宰政之獲上二者旣均得矣予何言雖然有進於是者不敢不終告也夫太上立德次立功立功亞矣而成之以勸斯中人之事而非所以語夫上哲也孟子曰待文王而興者凡民也侯以白士取巍科今茲用世方將揚休振華尙友千古與夫龍夔諸賢後先同德然則固天下之傑而區區百里之功效謂必俟于勸而後興其於待侯也不

淺甚哉用是而論有功而勸者臺府之職無所爲而立
德者豪傑之事審爾則今日之鐘鼓玉帛以侈一邑之
觀而爲羣有司之歆豔者在俟直一莞然也已矣俟作
而曰某不敏敢不承誨以無忘夙夜乃相與獻酬畢歡
而罷某退而詮次其語以諗諸在會俟頌俟于他日云

送李宗道分教宜興序

表天下風俗繫人材陶天下人材繫教化植天下教化
繫師儒周衰養士之法廢而學校不講士生無所於業
去而習爲縱橫詭變之術以鼓動諸侯當是時天下瓜
裂爭趨於戰鬥之場功利之區而先王仁義道德之風
頽敗塗地秦承戰國之後燔書戮儒令天下以法律爲

學其徒所談所職悉殘忍刻薄之事相帥成風傳染成
習舅姑父子之間諄語德色固當然者漢興除挾書禁
置博士官孝惠文景漸養休息士當熙洽之餘皆忠厚
長者恥言人過是故黎民醕厚興於禮讓而致治之美
與成康等東都橫經論道太學所養恆數千人于時士
爭濯磨直道清議夾持上下故雖桓靈之際君臣逆順
名分截然奸雄雖染指鼎味然卒以沮死由是觀之風
俗之美惡人材之正邪教化之隆替三者謂不相繫可
乎然子聞之教化之行自師儒始傳曰師道立而善人
多夫謂師道立者固以其仔肩綱常爲足成士類而愷
世教也用是言之教化人材風俗其責與任師儒之官

實係焉不亦難且重歟予友李君始以諸生貢南宮暨
卒業胄監掄材選部皆偃然首列士大夫固決其遠到
而君以母老乞祿養得分教常之宜興宜興佳山水饒
魚穀君奉母以居宜無不適然者而予私獨不滿若謂
位不稱才用特愧明時而傷知已雖然風俗重事也人
材教化急務也武城雖小獨無禮樂之責乎君尙黽勉
乎是他時安定之門才賢者輩出當有明揚之者先收
先生作梁棟予不佞得與諸鄉人誦之君郡之武康人
舊有聲場屋或報策名者屢矣已而竟不第

渚山堂詩話序

詩有序古也三百篇意深遠矣非序無以發其隱後世

沿此有詩話之作凡以探作者之意而示說詩者以辭則其始猶夫序也漢魏以降詩變于古至其道人情喻物理卽事以興而引類以賦其背于古者無幾也自夫江左之學興於是排比對偶拘忌聲病創立體製詩至于是益多術矣夫詩以道性情也降而變變而至于多術則後世之詩欲無說得乎嗚呼此詩話之所爲繁于序也是道也商句法擿語病詠風旨掄詞料糾謬誤示宗向必熟詩法而後可言必具史筆而後全美非是殆妄矣或曰詩言志古豈有法也自詩話作而學士大夫不易出語閭巷田野小夫女婦之詞不敢登什然則今之詩其遠乎性情而不三百篇若者斯實病之也安用

是則應曰詩話以衛詩也夫人情易流詞易靡廢棄禮法而放乎邪淫詩能導之故詩話之作用以範人性情而止乎禮義譬之用藥然詩則方也話則佐使之道斟酌增損之宜也故非處方則難乎藥之良非究詩話則難乎詩之善由是言之謂詩話病詩者非誣則愚也或者默而退乃筆之卷端用告夫學詩者

仙潭誌序

州邑之誌古列國之史也秦滅六國郡縣天下周官外史之制蕩廢而漢以來金匱石室之書惟王室有焉次而僭國僞朝雖或有作大槩以爲偏方亂國之書後世徒取參考而已不盡憑也古者九州之志謂之九邱邱

聚也言九州所有土地所生風氣所宜皆聚此書九邱
亡而後輿地有圖職貢有籍人物有表與夫山海水道
之有經風土歲時之有記斯各具邱之一而外史之遺
意今誌之大凡也仙潭舊無誌予幼也喜從鄉先夫大
老訪求其故而覽觀其迹時所指似者曰某某坊某某
第某山某游某邱某藏某也名宦某也全節某寓某某
產某小子識之又曰市名新本陸市更徙也其曰仙潭
謂昔爲仙人游泳也小子識之旣壯而仕仕而歸則昔
焉見聞恆了然心目之間而前所從受之人則物故殆
盡矣懼夫老而遺忘後將罔傳也爰輯而爲之誌歲丙
子八月書成客或笑曰是庸詎知不爲覆瓿者哉夫仙

潭郡邑之鄉鄙也今吳興則有誌餘不則有誌借其可
書二編者何遽遺而棄置弗登則無取者也子顧呶呶
焉又筆之而成書誣且贅矣予不能答則披卷謂所誌
者曰爾非湮鬱於數百年而揚露於今茲者乎爾非郡
乘所略邑策所不暇者乎爾姑謂宜傳曷默而不言爾
誠無言世其奚謂然則又自笑曰夫辯者不信自信者
不言爾其舍冷煖於自知者哉世有我同者知於覆瓿
免矣乃序而刻之

有竹亭會集詩序

予家之後有溪溪之上有村壬申歲謝歸飽食無事輒
命鈞具刺小舟溪中捨舟登陸則步從村徑扣竹扉息

林樹與野老爭席或戴月而返明年夏得地于村家之
西南隅俯清流側行逕嘉木蔭合土臺豐起其隙脩筠
若椽者左右森立乃據形勝作小亭其上亭成而水石
林野之趣不招自集若天特設以娛予者因誦坡老無
竹俗人之句命曰有竹遇風日清美則載觴豆至其處
戒童子速客客至據胡牀縱談大噱酒行罔算醉後得
句輒解冠取簪畫之竹上每竟一篇羣起讀之或嗟賞
唧唧氣酣耳熱卽朗吟高和擊竹而爲之節曾不知七
賢六逸之□□當何如也於是翕然相謂曰樂哉遊乎
客請月脩兩會會必以所作刻之竹存故事焉予曰可
捉筆爲序且立約以告預會者

綠鄉筆林序

屏退林下卽舍後創一圃首松關次篁徑崗者以梅坡者以梧柳芳而蹊槐古而塢入門則叢木蔽翳蒼翠濃鬱露光煙潤若膏沐然客啞然曰曩在山陰行千巖萬壑中空翠滴人令衣袂皆染今此景殆具體惜平壤耳然可名綠鄉因卽屏之楣榜焉鄉之中疊石曰渚山構椽曰萬雨軒軒左右皆竹爲□□□第一中設木榻二棐几一旁無長物惟置書度積緗素數千卷每旦興櫛竟卽埽地焚香據榻默坐外喧旣絕履跡不至則開卷接古人語竟日不得休遇有會於心駭乎目備該乎物情而資補乎治道或折衷羣言或獨出己見或事迹

爲史冊所逸或本□□□聞所□□□心領屬管子籍
之凡以備遺忘資談柄而已而錯雜無序則以隨日而
筆隨筆而得初不計也客或爲予誇綠鄉之佳漫應曰
是更有佳者或請所在則示以冊曰在筆林斯是矣客
讀而歎曰廣哉言乎斯鄧林之聚材矣乎於是筆林間
遠近昔右軍有云當其欣於所遇暫得於己快然自足
曾不知老之將至酸醜嗜好不啻是過抑予謝門徑久
矣將繼成筆林吾終老焉

西吳徵德序

陳侯治歸安之二三年迨書考矣早作而晏罷盱食而夜
思三月甲子侯以勞告病痾而七日弗汗謂且死矣其

邑士之需選與游庠者走相告曰嘻夫子殆矣是孰誨
我其父老與百役之在官者聚相謂曰嘻令君殆矣是
孰長我其孤老無告待哺于官者號于衢曰嘻吾父母
殆矣是孰衣食我於是相與奔走羣祀乞侯之生而邑
士又詞而達諸幽侯時眩亂莫知也浹旬侯竦然寤若
有起之者無幾體以平復出視事如故大夫士並持觴
核侯侯有間柳生如松輩出其禱詞之草以示客寔諭
于眾曰美哉意之盛乎是足以觀德矣是儀禮之所有
而周公之所已行也昔者子產聽鄭而鄭之士聚訕于
校甚者有孰殺之語夫子產賢大夫也庠校公論所在
也鄭之士詆子產於欲殺而湖之士乞侯於更生世謂

古今人相遠以今觀之侯之感動夫人人者視子產較賢矣今夫立下風而候顏色道盛德而延美譽凡事官長者率然至其滿而遷或黜而去則向背頓殊而甚則毀譽交反若是則昔之勤勤者諛且僞也翟公有言一死一生乃見交情夫死生之變較之遷黜則大矣叛而去之於庸情固宜今夫人者乃叫號走禱若臣子之急於君親而至誠相宣神聽是覲此其爲情視夫倏變於遷黜之頃者其賢不肖何如耶士則賢矣而非侯之素則不能有所感然則侯之賢將不於是而益可信耶霆不佞輒先舉解首之爲侯壽次之爲諸君美又次則以慶夫邑政之有終與湖俗之向厚也於是柳生輩以其

詞籍之冊請大夫士聲之詩而請予爲之序又合而標其首曰西吳徵德

龜溪送別圖序

昔張乖崖帥蜀幕僚有老而廢事者張恚曰胡不去明日以詩告行張喜其句謂其詩人也遽慰留之古今談者美乖崖之盛度而歎幕僚之勇退予謂張則賢矣幕僚者薄宦味於秋光侈歸興於山色蓋有激而云非真知退之高者也全椒張君主子德清簿旣踰考矣刺史方表上其治績君一不顧慨然白當道求去君之佐邑敏而勤理而能和其民視古老而廢事者則賢其去也上靡所拂內無所不足視古激而求去者則賢世謂今

人不逮古予卽張君而觀知斯語之誣且卑矣老子曰
知足不辱夫知足亦難矣自昔端委廟堂出入將相者
可歷歷數然而夷考其後則去之善者指殆不可多屈
甚者死下獄投遠方籍名丹書後先踵及使其守老氏
之戒固將先事而脫屣寧有是歟而君也官不過簿領
秩不踰九品方當轉遷之期而一旦謝去斯老氏所謂
常足者非歟君行有日子適臥病山間不及列餞者後
然聞之行李方戒邑之大夫士以暨耆老輩更次奉祖
征航宿溪澣至徒期乃得發夫古之循良者之去所部
也吏民往往挽轅而悲當轍而臥于時史官書之傳而
後世好事者復繪之爲圖今舟與轅等也餞而不得行

視夫挽臥者豈異也世之良史當繼跡有書而苟欲傳
繪事則斯圖其大凡矣君歸耕釣之暇幅巾藜杖往來
于瑯邪幽谷之間聆松風弄流泉援琴寫意必將續醉
翁之吟以脩環滁之故事而全椒之山則君故隱也聞
其中多有道之士他日邂逅復有束薪而煑石者爲我
寄聲曰空山落葉孰其慰風雨之夕乎水南山人候子
於渚峰久矣庶幾能來吾且釀以待

贈玉厓陸先生榮膺恩禮序

天下之正氣伸于抑天下之公論定于久包胥氏有言
人眾勝天天定亦克勝人嘗觀諸秦漢而下賈生之見
遷九齡之遭逐海南之行新州之竄其始爲之者人也

迨夫天日回照則褒忠錄賢慰生酌死而前日之所謂
正氣者固然于天地間如薑桂益辛而金石益貞如風
霆愈形而河岳愈亘如日星之終皎而冰雪之終凜於
是乎國是定朝議復鄉評物論同然而一詞嗚呼是孰
使之然哉其所以開導挽回之者天也當正德元二之
間逆豎擅朝太阿倒置飛廉惡來之徒導引左右玉之
不改者凜焉無幾其在朝著則元老逐大臣貶庶官囚
戮京輔戰汗奔趨無恥者當晝而乞哀天下之所謂正
邪是非溷淆且極然而正氣在臺諫故屢挫屢諍必至
於盡逐而後已時則玉厓陸先生以名御史挺身其間
先生嘗連疏累牘侃侃烈烈動輒數千言大槩以攻君

闕誅羣惡爲急予時在諫署讀而壯之以兼職右史爲
之手封納諸金匱先生繫獄視予爲久其受杖視予爲
酷放棄田里視予行遣爲重繼而元惡誅有詔收錄會
有忌於中者輒斥今上入繼登幽訪逐忌者如前焉又
輒斥先生宗眾有爲不平者往聲諸朝下有司勸駕有
司比于忌者又復輒斥於是黨正保明學校訟言薦紳
騰剡先生之正氣至是益耿然而所謂公論者不可復
奪矣乃嘉靖癸未東川劉侯來爲歸安甫下車卽上其
事于府府白之當道已而得報歲時優養准如詔書維
日之吉侯徵樂輿綵往致禮焉先生方且幅巾野服屢
而揖客卽席酒行有歎息于坐者曰吁哉斯禮之爲繫

重矣非良有司無以宣恩數之崇非先生無以益仕籍
之勸養□教行二美俱全嗚呼休哉予起而颺言曰嘻
休矣愚聞之觀政在朝觀治在野朝多逐臣君子謂國
家之屯野無遺賢然後治具張而化理臻夫使先生可
少則異時叫闔批逆胡獨氣□乎□臺之羣使朝家官
不失賢則冠冕珮玉固宜朝金闈暮彤闈胡爲乎隴耕
溪飲于夫城之南與川之濱然則今日之休槩諸國美
猶若有可□者矣先生莞然曰姑置是乃相與飲酒

萱節圖序

予歸田旣七年客有自歙來者介予門下士以萱節圖
丐序止而閱之則程生發以壽其外母氏姚者也生之

言曰姚爲臨溪吳處士尙清之配處士早世于時姚尙少艾子女在襁褓辛勤勵守迨今四十年笄者歸冠者室外亡者恤內殤者葬而□□□□其志以壽歿姚今且七秩矣歲首十日□□□□之□而孫支盈前甥館攸託鄉之人舉姚事者咸嘖嘖曰渠伊享有暮境天固有知哉若是亦足壽也已矣予聞而躍然以起曰有是哉曩予以諫官謫令休陽休陽予之桐鄉也其山川迴而風氣固巖谷之民冠裳語動儉朴淳質予愛其有古風焉間嘗舍郊而問俗其父老杖而進者時時能稱說詩書以古誼導官長然且睫龐巔皓若所謂南陽青城之民蓋壽者幾八九旣又訪貞烈揚女範知其女婦

娟靜脩好大率絕漢廣之遊而謹行露之冒蓋幽處者
多節負節者彌壽豈其風氣里俗夙相愜盛以是固然
而非其異者耶抑休之南曰婺源實紫陽夫子闕里也
固其道德餘潤有以養夫外內者身心是足以迪恆性
而保天和耶然則他壤固莫之儷矣今夫萱一微植也
樹之堂北示母道焉母道姚旣無愧也雖然體萱以蹈
德德以宅貞抱貞以完節節以彰壽則夫侑觴以圖表
圖以萱斯亦有謂哉予去休陽久失不能舉揚於曩昔
覽圖有覩生歸持一杯壽之爲我寄聲曰明天子方以
化理率海內斯圖將有徵哉觀風者早晚至矣

瑞鶴延祥圖序

怡梅李子得繪鶴于名筆以示水南先生先生爲之稱
賞且曰鶴羽之陽者也然遊于陰依火精藉金氣金數
九火數七戴九履七得乎純陽百六十年而羽翮如雪
又百六十年而目睛逾漆千六百年則卻乎食飲羣乎
鸞鳳爲洞天之靈物稱仙人之騏驥子誠玩是可卻凡
而希仙矣怡梅子躍然曰有是哉吾將以爲北野呂子
壽北野注籍天曹方需次而家食其爲人坦率樂易不
蓄底裏居常嗜經史外聲色卻塵鞅雖市朝未忘而林
野恆適每飽食後則領一鶴緩步孤往宴坐于北野之
石或激之使鳴或調之令舞恆謂人曰吾性喜鶴吾鶴
恰遭我吾年百六十而顛毛黧黑則鶴之大變矣要須

泥水不我污煙火不我涉吾豈非仙哉北野子今年值
知命吾持是鶴侑其慶觴其必當于心悅乎目賢于西
池之桃神仙之鹿矣先生謂何如先生曰可哉雖然於
北野未盡也鶴之爲鳴始聞于野迨其積養則聲聞于
天北野子方將登仕籍鳴于時鳴于朝繼則徹聞于天
壤斯其能事也安事於神仙鸞鳳之說哉吾謂北野子
且將出膺世用繼則挂冠冕招松喬偃仰林壑百年壽
考于斯時洞天注錄爲地仙爲天人鶴則越海傳壽南
蜚諧曲于是乎稱觴引物慶厥長生則北野子固驂鳳
駕鶴者矣於今日何如怡梅子曰唯唯

贈一素呂君暨配徐孺人偕壽序

古今之致壽厥道維二本之者德資之者養匪而德則
永年曷祈匪而養則大貴之生曷滋夫是而求壽之致
厥亦難矣箕疇五福首秩曰壽然繼之以富又繼之以
好德闕宮之頌曰俾爾壽而臧又曰俾爾壽而富臧固
德矣富則有生之資也德以事祈富以備養由是言之
壽之克致有外於箕疇之義與詩人之旨者歟猗歟天
鑒而錫遐人順而樂生德養並致伉儷偕老若一素呂
君之所值亶其罕矣君故唐栖鉅族其先君尙本翁擁
負重貲擬於猗頓至君益善藏厚殖光掩前業孝友謹
愿有稱于時且復朴而去華操而弗弛信順而不逾和
恬而靡盩厥配徐孺人懿慈清淑相成於內今年君壽

六秩有二孺人之齡遜其一乃季秋十三日際君弧旦而冬孟九日值徐之輓辰翩其吉昌後先以序荆藩侍醫李君輩往爲之壽從予徵侑觴之辭予嘗聞壽于夫子矣智者樂水仁者樂山智者樂仁者壽仁智德也樂山樂水德之發而養之餘也由是而樂焉靜焉壽可知矣唐栖去錢塘不五舍君里宅所在其前則江漲之流滙碧于門其南則平臯諸峰送青于牖固山水之窟也君與厥配居常攬風景挹游物舉觴之次風日和美仰而見山喜不騫之呈兆俯而臨流嘉無兢之可樂賓歡孔洽匏鼓諧奏不有召和而啟豫者哉今夫造化無全功生人靡全福臯橋齊眉德並稱矣而傭春則苦貧鹿

門躬耕養粗給矣而力作則戾和園池卒歲壽信高矣而無後則傷獨古今之遺憾寧復少也今君掩昔人之缺而享其全舉五福之蕃而有其四加之二子克賢偉爲國器他日顯揚之餘德以年劭養以祿侈鄉邦膳老夫則蜡賓朝家錫恩妻則命婦童顏鶴髮聯映于一堂而徽聲懿範並馳乎四遠顧豈非獨全于天表瑞于世者哉子歸老滋久犬馬之齒辱居君先維德與養則瞠乎其後引辭祝君良用自沮維古之有道者恆留有餘之福俾還造物君毋宜遽然其以分畀焉可也

送肖泉蘇先生之任南都武學序

國家治遵三古京師郡縣養士以學文闡武場比士以

制於是乎科登龍夔伍出頗收嗚呼盛矣然兩京自國
學外厥有勳戚之胄宿衛之子弟皆身膺貴爵而行當
顯任使其缺師則智謀難保其夙具膏梁未免於成習
一旦當事任值變故有不償事者鮮矣在昔周公作立
政不忘虎賁之恤宣王導諸侯必擇於國子之孝以今
準古武學之設緣此道也然則其師席之雄使選非其
人可輕授歟肖泉蘇先生始以鄉薦上春官既而再屈
則勉就教事其在吾邑尙志節循古雅端慎以率僚誨
切以迪士勞謙以接鄉大夫歲丙午期再北上竟以格
沮今年夏擢長南都武學教行李屆途其同寅葛君某
率庠之生徒奉祖于龜溪之上葛君私于眾曰嘻吾莫

之免矣維先生樂易忠敬恆不靳誨我用克有省庶幾
寡過今其舍旃去矣瞽矇莫扶吾曷其有瞭諸生曰然
旣又嗟曰嘗聞之經師易逢人師罕卽今失我人師後
則罔繼是豈唯爲長者戚將吾弟子輩病矣語竟行旌
至導賓者請入水南子舉解而言曰嗚呼美哉先生升
矣茲行官階抵國博門牆擬胄監士服而受經者無論
橫玉之貴屬鞮而從王者有時在釋菜之列北面吾師
弟子吾職其體貌則尊不寧是也介胄之士入禮門而
鞠躬剛勇之質聞鐘鼓而融化獻馘以奏愾貫革以程
射武備聿脩文事類飭其地置非散今夫君子之仕也
責不必諉功不必近誠使總司禁旅者於吾取材宿衛

王宮者恃吾有造繼是而往有如齊侯預顧命之策方
召擅壯猷之略考論所自以訓武之得師也然則玉帳
之作材疑無減於大學之造士彼以棖題用世之功專
歸安定斯亦偏矣先收先生作梁棟孰非茲行之早晚
之事歟先生于是大噓醕觴弗辭有間葛君命侑者升
歌九罭之什先生曰斯東人之留周公者也吾敢當辱
雖然意勤矣敢不拜賜維時辰景戒候津鼓催發水南
子度不可信宿則援筆作序姑相其

以下
原闕

若齋鄭太守華誕祝序

太守若齋鄭公治湖之明年爲嘉靖戊申乃仲冬十日
辛巳值公弧旦是日也鈴閣聿開雲幄載張慶觴來陳

匏鼓偕作吏人老父咸祝香于庭曰公敷德於湖歲再
閱矣傳有之大德必壽願我公享齡期頤進壽國脈用
延我民命其境之匹夫匹婦聞公誕吉咸舉手加額曰
公仁者援我於溝壑久矣仁者必有後願我公多男珪
璋聯駢襲美簪笏德清郝尹成性等陪位堂下睹禮序
之有章喜人情之協和乃奉觴再拜起而言曰公壽無
加祝矣維公勤勞外服豈直吏師抑邦國有賴性不敏
幸立下風公不我鄙夷獲免吏責維父母有生維公有
教觴畢之獻烏足當德繼自今願我公膺九遷陟三事
上媚天子而下式有位要俾故時門下走預有光焉區
區祝私願舉此酒于是贊者致詞相者請啐公爲之解

顏進觴欣欣愉愉不自知化日之舒以延也水南陳子
猥預鄉大夫之末從而序之曰猗歟君子之交下交匪
賔上交匪僭可以觀禮矣禮行于無間而志訖于有孚
可以觀政矣維湖之爲郡襟江帶湖南入山越以撫綏
則艱繭絲粟米之賦山澤之征歲贍王府以催科則勞
奸侵攘劫之弊戶土逋鬪之不平日興月盛以剖聽則
煩公來自地卿沈練明達中抱夙具外措合宜而復出
之以廉公體之以仁恕是故適權合節而民俗以安損
上益下而委輸以足塞源拔本而鬻訐以化公庭靖閒
郡以無事乃今始生之辰與夫大夫僚佐飲酒鼓瑟開
口而笑湖山當目意境欲仙不有導和而延豫者哉今

夫君子之交際相尚以道相援以禮是故上有鹿鳴之禮下則有天保之祝上有謙恭下士之美下則有門牆桃李之誼誠積而動物感而應然則公之所以逮下郝尹之所以歸德要皆由衷之懿非徒飾情借譽而已也詩曰樂只君子德音是茂公則允協矣又曰視民不忮君子是則是傲尹亦觀法焉嗚呼休茲是可詔有官君子也已郡僚諸公作而謂曰先生之言則然遂錄而上之用列之星圖之右

都門送別圖序

凡物在天下珍寶采繪有悅於耳目而無取於心懷之廣飲博談弄有豁於心懷而無取於耳目之益全是二

者其惟遠遊乎夫人里居而家食陂浸駭爲江河嶠嶂
目同嵩華州郡藩府拱若朝廷彼其見聞不出醯坎之
外是於爲耳目者隘矣心懷奚廣焉自夫慷慨出門足
跡萬里五方俗習備諳其詳夫然後聞見日廣而胸懷
之閒灑落充廓若所謂吞雲夢者反於吾身猶二人然
由今言之謂非遠遊之助不可也夫天下大勢山水之
勝誇東南地勢之雄稱西北吾嘗渡江淮涉呂梁道竟
魯目之所接南北之要衝中原之至險闕里之文化有
以愜意外之觀與平生之想而京師者天下根本也形
勢之尊宮闕之麗百官之富儀衛之盛下之閭閻之繁
庶貨賄之充物風物之華美誠有如昔人兩都之賦所

云者窮鄉下邑之士一旦至此縱觀焉有不益耳目而
廣心懷者乎抑未也今天子肇登大寶治先禮樂凡郊
祀明堂會同選舉悉以時舉行歲時之吉翠華臨鑿輅
出此又海內奇覩遐暉之氓蓋終世不可值者使夫遠
遊之士寓斯地而際斯時知其自慶也必矣乙丑之春
予姻某以輸賦來都下訖事告歸諭以前說意迄不可
止祖筵旣張用卽其所歷者繪爲圖以贈俾歸爲鄉之
好遊者陳之當有挾子長而踵來者矣

漢書齊刺之當孫將于其而戰來告矣

且也錢賈聽風而其浪烈香無滋潤以歸野歸公慶之
于國某以歸誠來將不於事治續續以府時意安不
德之士真誠服而烈誠如吹其自德也德矣心德之奇
出此天城內信歸誠如之足誰強辯不與前首其大表
與則望台同數事悉以和舉其誠德之吉舉非與德德
與心對善平既表出今天子舉意大寶前夫德德人德
水南集卷十一之十一且至其歸路酒首不益程其而